



續文獻通考卷之七十三

皇明進士雲間王圻纂輯

節義考 節婦

周

陶嬰魯門女少寡魯人將求焉嬰乃作黃鵠歌以自明終身不改

母師魯九子之寡母臘月休作從幼子歸視父母與諸婦孺子期夕而返歸太早止閭外期盡而入穆公聞之賜號母師使夫人諸姬皆師之

伯姬宋共公夫人魯宣公之女歸于宋十年共公卒伯姬寡居偶宋宮災左右曰火將至矣伯姬曰婦人之義保

傳不俱夜不下堂項之左右又曰夫人益少避伯姬曰  
越義而生不如守義而死遂逮于火而死  
蔡人妻宋人之女既嫁于蔡而夫有惡疾其母將改嫁之  
女曰夫之不幸即妾之不幸也柰何去之適人之道一  
與之醮終身不改夫茱萸之草雖甚臭惡猶始于採  
之終于懷擷之浸以益親况于夫婦之道乎彼無大故  
又不遣妾何以得去終不聽

鮑女宗宋人鮑蘇妻養姑甚謹蘇仕魯三年而娶外妻甚  
寵厚女宗如謂曰可以去矣夫人既有所好又何留乎  
女宗曰婦人以專一爲貞以善從爲順豈有專夫室之  
愛爲賢哉吾如不教吾以居室之禮而反欲使我爲凡

棄之行將安所用遂不聽事姑愈謹宋公聞之表其廬  
號曰女宗

楚伯羸秦穆公之女楚平王之夫人昭王之母也吳師入  
郢闔閭盡妻其後宮次至伯羸伯羸持刀拒之曰妾聞  
生而辱不若死而榮吳王慙遂退舍伯羸閉永巷之門  
三旬不釋兵秦救至昭王乃復國

貞姜齊侯之女楚昭王之夫人也王出遊留夫人漸臺之  
上而去王聞江水大至使使迎夫人忘持其符使者至  
夫人曰王與宮人約召宮人必以符今使者不持其符  
不敢從及還取符則水至臺崩夫人沉水而死王曰嗟  
夫守義守節不爲苟生處約持信以成其貞乃謚曰貞

姜

貞姬楚白公勝之妻白公死其妻紡績不嫁吳王以重幣聘焉白妻辭之曰忠臣不借人以力貞女不假人以色豈獨事生若此于死者亦然妾不能從夫死今可更嫁乎卒拒不行

魯潔婦秋胡子妻也納之五日而去官于陳五年乃歸未至家見路旁婦人採桑秋胡子悅之下車謂曰力田不如逢豐年採桑不如見貴郎吾有金願與夫人婦人曰吾不願金所願卿無有外意妾亦無淫佚之志收子之齋與筭金秋胡子遂去至家奉金遺母使人喚婦至乃嚮採桑者秋胡子慙婦曰子束髮辭親往仕五年乃當馳驟揚塵疾至今乃悅路旁婦而聲之金是忘母也是汚行也遂投河而死

韓憑妻宋人宋王悅其色築高臺而窺之既而殺憑欲以爲夫人憑妻歌曰燕雀卑棲不樂鳳凰妾是庶人不樂宋王遂自縊而死宋王怒令遠夫墓葬之不得合壙後二墓上常有鴛鴦飛相往來

梁高行梁之寡婦色婉而性淑夫早逝梁貴人多欲娶之不能得梁王聞之遣使聘焉高行曰妾夫不幸死妾爲養其幼孤貴人求妾者幸免今又辱王命妾聞婦人之義一醮不嫁以全貞信之節今志主趨生是不信也貴而忘賤是不貞也棄義從利無以爲人乃援鏡持刀

以割其鼻曰王之求妾以色也今妾刑矣何以事王使  
還報王重其義復其身號曰高行

共姜衛世子共伯之妻共伯早死共姜守節父母欲奪而  
嫁之不許作栢舟之詩以自誓

杞梁殖妻齊人也莊公襲莒殖戰而死莊公歸遇其妻于  
路使吊之辭曰有先人之敝廬在下妾不得與郊吊莊  
公乃還詣其室成禮妻無子內外無五屬之親乃枕其  
夫之屍于城下而哭城爲之崩旣葬夫赴淄水而死

代趙夫人者趙簡子之女襄子之姊代王之夫人也襄子  
誇代王使厨人以斗擊殺之而迎其姊姊曰吾聞婦人  
執義無二吾豈有二夫哉欲迎我何之遂呼天磨笄自

刺死今人因呼爲磨笄山

秦 羅敷邯鄲女子爲千乘王仁妻仁後爲趙王家令羅  
敷出采桑陌上趙王登臺見而悅之置酒欲奪之羅敷  
善彈箏作陌上桑詞三解以自明不從

漢

桓嫠沛郡劉長卿之妻桓鸞之女也生一男五歲而長卿  
卒妻遠嫌疑不肯歸寧兒年十五夭歿妻慮不免乃豫  
刑其耳以自誓沛相王吉上奏高行題其門閭號曰行  
義桓嫠縣邑有祀必膳焉

王莽女爲孝平皇后孝平崩莽移漢號其女爲黃皇室主  
欲更嫁之令立國將軍孫建世子豫將醫往問疾后大

怒因稱廢疾不肯起葬遂不敢強及漢兵誅莽后曰何面目見漢家自投于火而死

禮宗者安定皇甫規妻也不知何氏女規初喪室家後更娶之及規卒時年猶盛而容色美董卓為相國聘以輜輶百乘馬二十疋奴婢錢帛充路氏乃輕服詣卓門跪自陳請辭甚酸愴卓使傅奴侍者悉拔刀圍之而謂曰孤之歲教欲令四海風靡何有不行于一婦人乎氏知不免乃立罵卓卓乃引車庭中以其頭懸鞞鞭朴交下氏謂持杖者曰何不重乎速盡為惠遂死車下後人圖畫號曰禮宗

趙萬妻宕渠人名娥避黃巾寇走萬足疾不能行娥扶

行萬為賊所殺賊欲污娥以刃迫之娥聳身將刀貫心達背而死

樂羊子妻河南人羊子嘗遊學七年不返妻常躬勤養姑兼餽羊子後盜有欲犯者先劫其姑妻操刀而出盜曰釋汝刀從我者可全汝姑不從則殺妻仰天而嘆舉刀刎頸而死盜亦不殺其姑太守聞之即捕殺盜而以禮葬之號曰貞義

唐姬漢廢帝弘農王妃靈帝崩子辯襲位董卓令李儒進酖王謂姬曰卿王者妃勢不復為吏民妾幸自愛遂飲酖死姬時年十八歸潁川父會稽太守瑁欲嫁之姬誓不許及李傕破長安得姬欲妻之固不聽尚書賈詡知

之白獻帝帝感愴迎置園中使使持節拜為弘農王妃  
陰瑜妻荀氏名采潁川人爽之女明敏有才藝年十九而  
瑜卒無子同郡郭英喪偶爽以來許之因詐病召采既  
不得已而歸懷刃自誓爽命侍婢奪其刃女既至郭氏  
乃偽為懽悅之色因勅令左右辦浴既入室揜戶以粉  
書扉曰尸還陰氏遂自縊

魏

夏侯令女為曹爽從弟文叔妻早寡無子父文寧欲  
嫁之令女以刀截兩耳自誓居常依爽爽誅其家上書  
絕婚強迎以歸復將嫁之令女竊入寢室引刀自斷其  
鼻其家驚惋謂之曰夫家夷滅已盡守此欲何為令女  
一者不以盛衰改節義者不以存亡易心司馬懿聞  
而賢之聽使乞子自養為曹氏後

吳

許昇妻呂氏字榮由拳人許昇少為博徒無操行榮  
勤業養姑數勸許昇修學有不善輒流涕進規榮父疾  
許昇呼榮改嫁榮終不肯歸許昇感激自勵遂以成名  
尋被辟命行至壽春為盜所害刺史尹耀捕得之榮乃  
手斷其頭祭許昇巨族多欲聘之榮誓不再嫁黃巾之  
亂賊欲污榮義不以身受辱賊遂殺之是日疾風暴雨  
雷電晦暝

焦仲卿妻劉氏仲卿為廬江小吏妻為姑所逐自誓不嫁  
其家逼之乃投水死

孫達妻卻氏李公謀妻戴氏遭寇欲劫與俱行二婦罵

詈不絕口遂被害

孫竒妻范氏名姬歸竒一年竒亡父母以其無子迎還其家姬不往迎者迫之姬乃截耳與鼻曰父母迎我者以我色能事人也今殘廢人矣行將何爲迎者乃返

王氏女平度州人女家貧從夫秦友築未毛城累糧以從夫亡乞棺葬之剖心以殉時人哀之爲起祠

顧承妻張氏

以承爲孫權所囚奪張改嫁丁氏張飲

張白妻陸氏績之女名鬱生年十三適白白罹家禍因遷徙異郡遂誓不嫁姚信表之

晉

綠珠石崇妾也姓梁氏孫秀得寵于趙王倫使人求

之崇出諸妾美麗者使任所取使者曰奉命求綠珠他人無與也崇曰綠珠吾所愛不敢承命使者乃返後秀族滅崇家崇謂綠珠曰吾爲汝受禍汝將如何綠珠曰妾終不負君乃自墜樓而死

辛氏狄道人嫁散騎常侍梁緯西都陷緯爲劉曜所害辛有殊色曜將妻之辛搥地大哭曰女不再醮乞就死曜曰貞婦也任所之乃自經死以禮葬之

愍懷太子妃王氏太尉衍之女也字惠風太子旣廢居於金墉衍請絕婚惠風號哭而歸行路爲之流涕及劉曜陷洛陽以惠風賜其將喬屬屬將妻之惠風拔劍拒屬曰吾太尉女皇太子妃義不爲逆胡所辱屬遂害之



龔憲京兆人杜有道妻年十八而寡誓不改節撫教孤子植及女譁後植果顯女亦有淑德

賈濟妻宗氏渾爲介休令被劉淵將喬晞攻破死之宗氏有姿色晞欲納之宗氏罵曰屠奴豈有害人之夫而欲加無禮於其妻於爾安乎何不促殺我因仰天大哭晞遂害之時年二十餘

許延妻杜氏延爲益州別駕爲李驥所害驥欲納杜氏爲妻杜氏號哭守夫尸罵驥曰汝輩逆賊無道死有先後寧當久活我杜家女豈爲賊妻也驥怒遂害之

皮京妻龍氏字憐狄道縣人年十三適京未逾年而京卒京二弟亦相次隕旣無胤嗣又無期功之親憐貸其嫁時資裝躬自紡績數年間三喪俱舉葬殮旣畢每時享祭無闕州里聞其賢屢有聘者憐誓不改醮守節窮居五十餘載而卒

北涼 楊氏呂纂之妻弘農人美豔有義烈纂爲呂超所殺遂欲妻之謂其父桓曰后若自殺禍即及宗桓告楊氏氏曰大人賣女圖富貴一之已甚其可再乎乃自殺張氏泰安呂紹妻年二十紹死便請爲尼呂隆見而悅之欲穢其行張遂升樓自投于地二脛俱折而死

張天錫妾閻氏薛氏咸有寵天錫疾謂曰汝二人何以報我吾死後豈可爲人妻乎皆曰尊若不諱妾請效死供洒掃地下誓無他志及疾篤二妾皆自刎天錫疾瘳追

悍之以夫人禮葬焉

秦符登妻毛氏壯勇善騎射登為姚萇所襲遂欲納之毛氏罵曰吾天子后豈為賊羌所辱何不速殺我因小夫大哭曰姚萇無道殺天子今又欲辱皇后皇天后乎不鑒照長怒殺之

段豐妻慕容氏德之女德既僭位署為平原公主十四適於豐豐為人所譖被殺將改適偽壽光公餘熾慕容氏謂侍婢曰我聞貞女不事二夫今主上不顧禮義嫁我若不從則違嚴君之命矣於是尅日交禮偽辭以疾熾不之逼三日還第沐浴置酒言笑自若至夕密書其裙帶云死後當埋我於段氏墓側遂於浴室自

縊死

南齊蔣雋妻黃氏宜興人夫早世矢志不踐二庭家人逼之欲自殺乃已建元二年表其閭

梁王氏灞陵王整之妹冒母姓姚氏名姚王京年十六歸衛敬瑜敬瑜溺水死王京守志養舅姑嘗有雙燕巢梁間雄為執鳥所傷其雌悲鳴至秋集王京臂如告別王京以紅縷繫足曰新春復來為吾侶也明年果至如是者五六年王京病卒燕復來家人語曰王京死矣墳在南郭燕遂至墳所亦死雍州刺史晉昌侯操題曰旌義衛氏之門

有陳楊氏會稽人張彪之妻陳文帝入會稽遣章昭達

領兵購之并圖其妻兵殺彪并其弟首致於昭達文帝遣兵迎楊楊便破涕爲笑給昭達殯彪畢當從命殯事既畢還經彪宅謂昭達曰婦人本在容貌今辛苦日久請暫過宅粧飾楊入屋遂割髮毀面哀哭大慟誓不更行文帝聞之歎息許爲尼終不敢逼

北魏

董景起妻張氏陳留人皇興間景起早亡張時年十六痛夫少喪且無子息遂哀傷過禮終其身不食葷血獨守貞操鄉曲高之終見標異

史映周妻狄氏滎陽人年十七適于映周太和二十三年映周卒狄恐父母奪其志因葬映周遂慟哭嘔血而殯見者莫不悲嘆屬觀風使以狀上詔表其閭

刁思遵妻魯氏滎陽人始笄爲思遵所聘未逾月而思遵亡其家憫其少寡許嫁已定魯聞之以死自誓父母不達其志遂赴郡訴稱刁氏恠護寡女不使歸寧魯乃與老姑徒步詣司徒府自陳狀普泰初有司聞奏詔本司依式標榜

張洪初妻劉氏滎陽京縣人年十七夫亡遺腹生一子三歲又歿其舅姑年老朝夕奉養兄矜其少寡欲奪嫁之劉自誓不許以終其身

後周 鄭善思母崔氏清河人年十三適滎陽鄭誠生善果周末誠討尉遲迥力戰而死母年二十而寡父彥睦

欲奪其志。苞善果曰：婦人無再適人之義，且鄭君雖死，幸有此身。心為不慈，背死夫為無禮，寧當割耳截髮，以明素心，違禮滅慈，非敢聞命。後善果為魯郡太守，有過毋蒙被而泣，終日不食。善果由此克已，號為清吏。隋永興公主，文帝之女，始嫁為周後主后，後文帝受禪，後主卒，仍稱公主，欲嫁之。公主誓不從而卒。

韓覬妻于氏，河南人，字茂德。于氏年十四，適于覬。年十八，覬從軍，歿，氏哀毀骨立，慟感行路。父以其幼少無子，欲更嫁之。女誓無異志，截髮自明。養夫之孽子，世隆為嗣。良，同七生，自孀居後，惟時或歸寧。至於親族之家，絕不往來。有尊屬就省，謁者送迎，皆不出戶庭，蔬食布衣，不聽聲樂，以終其身。高祖聞而嘉嘆，下詔褒美，表其門閭。長安中，號為節婦閭。

孫神妻陳氏，河北郡人。神戍夏州，未幾喪亡，柩至，陳望見，哀慟一哭而卒。文帝詔表其閭。

襄城王恪妃者，循州刺史柳旦女。妃姿貌端麗，年十餘，以良家子召見，娉為妃。未幾而恪被廢，妃修婦道，事之愈謹。煬帝嗣位，復徙邊，帝令使者殺之於道。恪與辭訣，妃曰：若王死，妾誓不獨生。恪死，棺殮訖，遂撫棺號慟，自經而卒。

元務光母盧氏，范陽人。盛年寡居，漢王諒反，遣將綦良往。

山東略地良以務光爲記室及良敗慈州刺史上官政簿籍務光家見盧氏逼之盧氏以死自誓政凶悍怒甚以燭燒其面盧氏執志彌固竟不屈節而死

裴倫妻柳氏河東人大業末倫爲涇源令爲賊薛舉所陷倫遇害柳氏年四十有二女及兒婦三人皆有美色柳氏謂曰我輩遭逢禍亂汝父已死我自念不能全汝我門風有素義不受辱於群賊我將與汝等同死如何女等垂泣曰唯母所命柳氏遂自投於井其女及婦相繼而下皆死井中

崔氏趙元楷妻清河人隋末宇文文化及反元楷奔至河北將歸長安至滏口遇盜僅以身免崔氏爲賊所拘請以爲妻崔氏曰我士大夫女爲僕射子妻今日破亡自可即死終不爲賊婦群賊裂其衣縛於牀責之上將陵之崔氏懼爲所辱詐之曰今力已屈當受處分賊遂釋之崔因取賊刀倚樹而立曰欲殺我任加刀鋸若覓死可來相逼賊大怒亂射殺之元楷後得殺妻者支解以祭其墓

唐

李德武妻裴氏字淑英安邑公矩之女以孝聞鄉黨德武在隋坐事徙嶺南時嫁方踰歲矩表離婚德武謂裴曰我無還理君必儷他族于此長別矣答曰願死無他即欲割耳自誓德武不許自是不御薰澤讀列女傳見

述不更嫁者謂人曰不踐二廷婦人之常何異而載之  
書後十年德武未還矩決嫁之斷髮不食矩知不能奪  
聰之德武更娶爾朱氏遇赦還中道聞其完節乃遣後  
妻迎裴復爲夫婦如初

楊三安妻李氏高陵人舅姑及夫相繼卒子孤寡李晝田  
夜紡三年間葬七喪太宗賜帛二百免其徭役

房玄齡妻盧氏清河人玄齡微時病且死謂盧曰吾且死  
君年少不可寡居善事後人盧泣別一日以見志

崔繪妻盧氏鸞臺侍郎獻之女繪喪盧年少家欲嫁之稱  
疾不許女兄適工部侍郎李思冲早亡思冲欲求爲繼  
幣三百舉盧不可曰吾豈再辱于人寧沒身爲婢

耳是夕出自竇糞穢蟻面還崔舍斷髮自誓武后詔爲  
浮屠尼以終

樊會仁母敬氏河東人字象子笄而生會仁夫死事舅姑  
孝順舅姑以其少欲嫁之潛約婚于里人至期陽爲毋  
病使歸視敬至知見給乃佯爲不知者私謂會仁曰舅  
將奪吾志汝云何會仁泣敬曰兒毋啼乃伺隙遁去追  
及半道以死自誓乃罷會仁未冠卒敬毋亦死葬畢謂  
所親曰毋死子亡何生爲不食數日死聞者憐之

樊彥琛妻魏氏江都人魏以彥琛病篤欲殉以死彥琛止  
之及卒值徐敬業亂陷于兵聞魏善音令鼓箏魏即以  
刀斷其指軍中獲之魏固拒求死遂見殺

楚王靈龜妃上官氏下邳士族靈龜出繼哀王後而舅姑  
在朝夕侍養謹甚靈龜卒將葬議者欲不舉前妃妃曰  
逝者有知鬼可無托乃備禮合葬服除兄弟諭以無子  
可不有行妃泣曰丈夫以義婦人以節我未能殉溝壑  
尚可御粉澤祭他祚乎將自剗衆救乃止

王泛妻裴氏永泰中遇賊欲污之罵曰吾衣冠子豈愛生  
受污耶賊臨以兵罵不止乃支解贈河東縣君

李氏二女白之孫也已爲編民陳雲劉勸妻宜歛觀察使  
范傳正與白有世誼訪得之勸之改適士族二女曰夫  
婦之匹命也在孤窮旣失身下俚仗威力又援締他門  
死何面目見大父于地下傳正不奪其志且爲復其

役

王韞秀王忠嗣女忠嗣鎮北京以女歸元載元載少貧歲  
久見輕韞秀勸之遊學肅代兩朝載爲宰相貴盛賓客  
候門韞秀復爲詩以諫之有公孫開館招佳客知道浮  
雲不久長之句元載不聽被誅上令王氏入宮嘆曰二  
十年太原節度使女十六年宰相妻誰能爲長信昭陽  
之事遂斃于京兆杖下

蘇飛妻陳氏餘干人年十七適飛未幾飛死廬于墓悲苦  
凡三十年親黨莫奪其志永貞間賜旌表

堅貞節婦李者年十七嫁爲鄭廉妻未踰年廉死常布衣  
蔬食夜忽夢一男子求爲妻初不許後數數夢之李自

疑容貌未衰醜所召也即截髮衣麻衣不薰飾垢面塵  
膚自是不復夢刺史白大威欽其操號堅貞節婦表旌  
其門名所居曰節婦里

符鳳妻某氏字玉英貌姝美鳳以罪徙儋至南海爲獠賊  
所殺脅玉英欲私之對曰一婦人不足事衆男子請推  
一長者賊然之乃請更衣有頃盛服立于舟罵曰受賊  
辱不如死自沉于海

王琳妻常者士族也琳爲眉州司功叅軍俗僭侈盛飾常  
不知有簪珥訓二子堅冰有法後皆名聞琳卒時常年  
二十五家欲強嫁之常固拒不聽音樂處一室或終日  
不食卒年七十五著女訓行世

盧惟清妻徐氏淄川人惟清仕校書郎以僚姻累貶播州  
尉徐還鄉里糲食不御鉛膏采繡會大赦徐聞閔迎惟  
清至荆州聞惟清死二髯歎將劫徐歸下江徐知之數  
其罪奴不敢逼劫其貲去徐倍道行至播州足爾流血  
得惟清尸以喪還闕歲至洛陽葬之以無子終服還陳  
留汴州刺史徐澣高其節頌而詩之

郭待徵妻薄氏從待徵官河東會表晁亂薄爲賊所掠將  
污之不從語家媪使報待徵曰我義不辱即死于水賊  
去得其尸義聲動江南李華作哀節婦賦

李廷節妻崔氏乾符中廷節爲郟城尉王仙芝攻汝州廷  
節被執賊見妻姝美將妻之詎曰我士人妻死亡有命



奈何受賊污賊怒剝其心食之

殷保晦妻封敖孫也名絢字景文能文章草隸保晦歷校書郎黃巢入長安共匿蘭陵里明日保晦逃賊悅封色欲取之固拒賊誘說萬詞不荅賊勃然怒曰從則生不然膏我劔封罵曰我公卿子守正而死猶生也終不辱逆賊手遂遇害保晦歸一慟而絕

張真妻黃氏名帛夔道人真因過江覆沒帛求夫尸不得于溺所仰而嘆遂自沉積十四日帛尸抱夫尸出灘下慶德公主李氏宣宗女也爲高陵于琮妻琮爲常保衡貶韶州公主借之韶州行則肩輿相隨坐則執琮之帶琮由是獲全及琮爲黃巢所殺欲脅公主公主曰我唐室之女誓與僕射俱死賊并殺之

羅文姬字叔善南昌人年十六適鄭氏疾篤執文姬曰汝盛年當別適人姬誓不嫁鄭亡投繯而死

朱延壽妻王氏延壽之妹爲楊行密妻行密狎延壽延壽怒陰欲歸唐行密詐執而殺之捕騎至家妻集家人聚寶貨焚府舍曰妾誓不以皎然之軀爲讐人所辱遂赴火而死

賈直言妻董氏名德真浚儀人直言坐事貶嶺南以妻少乃訣曰生死不可期可亟嫁無須也董不荅引繩束髮封以帛使直言署曰非君手不解直言貶二十年乃還署帛宛然及湯沐髮墮無餘

洪勝可妻梅氏夫死于黃巢之亂賊且逼梅梅誓以死白  
馬將軍見而苛之恐卒見汚因殺之以全其節  
李誼妻盧氏美姿容能屬文咸通末極擢進士仕考功郎  
中黃巢亂避地平陽僖宗召爲翰林學士極死盧伏屍  
哭王行瑜兵逼之不從脅以刃斷一臂死  
何氏女餘干人年十六爲黃巢所執罵賊不受汚遂死之  
惡善鄧氏賤詔妻也南詔主殺其夫欲聘爲妻不從發兵  
嚇之閉城三月食盡盛服端坐而卒

五代

成妻周氏良鄉民也成年五十乏嗣娶周氏生一子後  
咸安周氏年二十服闋親戚咸勸之再適周氏曰

烈女不更二夫妾雖愚婦豈肯更二姓乎于是服勤耕  
織事姑三十餘年事聞詔旌其門

王凝妻李氏青州人凝爲魏州司戶叅軍卒于官携其幼  
子負骸骨以歸過開封逆旅主人不納牽其臂出李氏  
慟曰我不能守節此手爲人所執引斧自斷其臂事聞  
官爲賜藥而答主人

南唐樂平公主徐知誥女嫁爲江南國主楊璉后知誥受  
禪復稱公主每涕泣不食曰我爲人家婦而宗社覆滅  
何以生爲諸兄皆惡之知誥曰婦人內夫家此宜也後  
璉卒主相繼亦卒

余洪妻鄭氏建州人查文徽平建州鄭氏爲亂兵所獲文

續文獻通考卷之七十四  
徽欲犯之鄭氏罵曰王師吊伐凡義夫節婦宜旌賞乃  
欲加非禮于一婦人文徽愧求歸之

續文獻通考卷之七十四

皇明進士雲間王圻纂輯

節義考 節婦二

宋

周渭妻莫氏名筌恭城人劉鋹時渭避難奔走不暇與筌  
訣二子孩幼筌尚年少父母欲嫁之筌泣誓曰渭必能  
自奮于是親蚕績碓春以給朝夕二子皆婚娶凡二十  
六年太平興國初渭復歸人皆異之

劉氏建安曹觀之妻皇祐五年觀守封州儂智高陷郡死  
之劉逃難林垌中知觀死亦自經曰吾不可污于賊事  
聞追封彭城縣君加贈冠帔

張氏江夏民婦里惡少謝師乞過其家持刀逼欲污之張大罵曰庸奴可死不可辱也師乞以刀斷其喉未即死猶能擒師乞告隣人遂死嘉祐中封旌德縣君表墓曰烈女賜酒帛令郡縣歲時致奠

趙節婦達州人務居有竟人欲犯之脅以白刃終不屈既而誘以百端終不可遂刺殺之皇祐二年知州薛侏爲立碑于州之西北山上後邑令薛仲侃創祠祀焉

趙氏貝州人賊王則反聞趙有殊色劫欲爲妻趙以計脫歸使賊禮迎至期恐不行則賊將屠其家乃登輿自縊而死

永泰縣王太祖從孫女性孝敬年十四歸元班殿直梁子才克執婦道事舅姑孝謹夫亡時永泰年二十二哀毀幾隕諸族欲奪志永泰以節自誓終身不渝初封共康郡君元豐中加今封以褒榮之

包纒妻崔氏纒早亡惟一幼兒姑意崔不能守使人試其心崔蓬垢涕泣曰生爲包婦死爲包鬼誓無他也後兒亦卒母呂誘崔嫁崔曰舅歿姑老將安之乎呂怒崔泣曰倘以不義見迫必絕于尺組之下母乃止卒于包氏事閭旌表纒拯之子也

吳白妻徐氏餘干人年十九白將死喻之曰幸念爾子善事後人徐刺目以示白建中靖國間旌表門閭

姚三五妻程小姑大邑人一日姚如外小姑竊然獨居夜

漏半強奴挾刃逼之號呼義不受辱身被重創者十四  
訖全大節縣上其事論奴如律大觀中封旌德縣君

張廷榮妻王氏壽光人宣和間賊邢貞執其翁王以金帛  
贖之又欲逼其從王怒罵不止遂見殺時年二十詔旌

其門廷榮後歸金中進士  
孫節婦項氏吉水人宣和間夫以逋出走項為里胥執送

官至中途欲犯之項即引刀自刺郡以聞詔旌其廬  
王氏睢陽人適宗室趙子一一亡王氏誓不嫁靖康之變

避地鎮江亂兵陷城王氏用墜土自毀負其姑秀容縣  
君以逃且襁携幼子他子引其裾纍然轉徙亂尸間越

四年始達溫陵移居莆田終焉一時名人如陳俊卿輩  
皆有詩哀之

張晉卿妻丁氏新鄭人靖康中與夫避金兵為所獲挾之  
馬上丁自投于地戟手大罵連呼曰我死即死誓不受

辱復挾上馬再三罵不已卒忿然舉槌縱擊死杖下  
王氏二婦汝州人建炎初金人至汝二婦為所掠置之舟

中二婦乘間遂投漢江而死尸皆浮出不壞時人收葬  
城外江上為雙塚以表之

向氏長陽人建炎中保山寨以避寇賊皮仲破寨向義不  
辱被殺人見其白乳自吮流踵向之子後誘賊醉而殺

之以復母仇  
南劔州小常村婦人失其姓氏建炎四年五月楊勅叛卒

續文獻通考 卷之三百一十四  
四首游  
由建安寇延平道出小常村掠婦逼脅欲犯之婦毅然  
誓死不受污遂遇害橫屍道傍賊退人爲收瘞之而其  
屍枕藉處迹隱然不滅每雨則其迹乾晴即濕宛如人  
影往來莫不嗟異鄉人或削去之隨即復見覆以他土  
而其迹愈明

葉氏長汀人歸爲石城賴仲元妻事舅姑無間言仲元遊  
嶺表未還建炎中盜起寧化直抵石城葉以夫旅遊舅  
姑年邁勢不能遁委命以待俄寇至閭里婦女悉驅迫  
棄家葉極口罵賊以身自觸白刃寇怒斷其喉舌子女  
皆遇害

師氏彭州永豐人適范世雍子孝純建炎初還蜀至唐州  
爲賊朱顯忠所掠孝純先被害欲污師氏師氏大罵不  
屈遇害

馬元穎妻榮氏儀真人元穎爲將作監薄建炎兵亂榮氏  
奉姑携子以逃爲賊所劫以兵脅之不從賊怒傷其姑  
榮氏叱之又殺其子榮氏自刃其臂罵賊不已遂殺之  
王宣妻曹氏臨淮人建炎中盜馬進掠臨淮宣要曹氏同  
避曹曰吾聞婦人死不出閨門賊至遂赴刃而死  
鍾離婦紹與間金人攻陷濠城欲驅之去婦曰吾良人子  
從汝賊耶金人怒斷其臂婦罵不絕而死

梁氏龍泉人適同邑李生盜彭友犯吉州梁義不受辱赴  
水死

黎婦管氏寧都人紹興間李寇破縣欲污之管不從罵賊被殺

黃淑字致柔建寧進士王昉妻昉爲泗洲戶曹卒黃挈柩歸未幾母又卒所親議改適廬陵令黃誓不改節詠竹詩以見志議遂寢後憂鬱死臨終囑其妾以詩置柩中廖氏新喻人貢士歐陽希文妻紹興間建昌白氈笈丸過臨江廖以身蔽姑使希文負之逃廖爲賊所執正色叱之至斷其耳與鼻猶罵賊遂遇害淳熙間郡守以聞勅封護其墓

羅愛卿年十八適趙氏子趙入京求仕因亂爲劉萬戶所虜誓不屈自縊而死

吳氏建陽人兵部尚書呂祉之妻累封淑人祉爲麗瓊所害有得祉括髮之帛歸吳中者吳氏持帛自縊以殉葬吳永年妻何氏金兵陷平江執何氏及永年姊何給之曰婦人東西惟命何勢爲賊信之不爲備行次水濱何投于河姊繼之陳長方爲作二烈婦傳

張弼妻徐氏名觀和州人建炎三年金兵犯邑官軍奔潰肆掠執徐欲污之徐瞑目大罵賊刺殺之投于江

譚氏英州真陽縣人曲江村士人吳琪妻也紹興五年爲觀音山盜所執欲妻之譚怒罵不屈被害同時有南雄李科妻謝氏囚于虔盜中數日有欲犯之者唾其面曰寧萬段不汝狗盜殺之

涂端友妻陳氏臨川人紹興九年盜驅入黃山寺逼以刃  
大罵不屈乃幽之屋壁數日族黨有得釋者咸齎金帛  
以贖其孥賊引端友妻令歸曰吾聞貞女不出閨閣今  
吾被驅至此何面目復登涂氏堂復罵賊不絕竟死之  
劉生妻歐陽氏安福人紹興十年生以事出惡少欲侵之  
不受辱而死

劉氏海州朐山人適同里陳公緒紹興末公緒挈其子歸  
宋劉時歸寧倉卒不得與偕獨居二十五年緯蕭自給  
吳公緒音問不通或勸其改適終不從後子寢長思母奔  
走淮甸遂得迎母以歸

嘉豐婦張氏嘉定中爲寇蔡六所掠罵賊不屈遇害帥魏  
公嘉其節以禮具葬題其墓曰節婦張氏之墓  
龔自立妻張氏樂昌人嘉定中寇至夫妻襁負二稚竄匿  
爲賊所得脅以行張與夫訣曰妾死無憾所憐者二子  
幸善撫之中道詒賊曰吾渴欲飲可暫解我縛賊從之  
遂投江中邑人立祠祀之

廖氏沙縣人性慧解歌舞紹定三年爲賊所掠命之歌舞  
廖罵曰我恨不磔汝寧肯悅汝耶賊怒殺之時賊欲窺  
城廖有娠賊剗其腹觀男女以卜進退得女遂引去招  
捕使陳韓以聞詔贈懿節夫人立廟祀之

林氏龍溪人年十九嫁爲謝氏婦踰年而寡父母以其無  
子欲奪而嫁之誓不許曰吾立一嗣亦無不可守志六



十餘年嘉熙間縣令趙絳夫爲立碑于墓郡守李韶書曰守節婦林氏墓

王友筠妻李氏句容人年二十一而友筠卒有子方在襁褓父母欲奪其志李泣曰夫不幸死尚有子使我又棄其子乎因剪髮自誓淳祐間詔旌其門

吳世靜妻涂氏進賢人夫早卒止有一女勵志守節淳祐中北兵遊騎至章江涂氏撫其女曰世亂如此無辱身相携赴水死

王德甫妻余氏德甫以訟喪家令余改適余卒不行咸淳中危順吉即其里立節婦坊與以粟帛

李二氏保昌人宋末賊掠其村二婦義不受辱投水而死

李氏樂安人適邑西楊氏德祐間元兵至爲賊所獲逼之李抗罵而死

譚氏婦趙氏永新人元兵破城趙氏抱兒匿鄉校禮殿中爲悍卒所獲欲污之不從臨以刃曰吾與不義而生寧死從吾舅姑耳遂與嬰兒同遇害血漬禮殿入磚上宛如婦抱嬰兒狀或磨之其狀益顯詔即學內立廟祀之朱氏莆田人通判興化軍陳用虎妻也封安人元兵寇閩用虎之兄文龍知軍事發兵固守及元執文龍以去朱氏遂自經死

饒氏寧國人年二十一適宣城吳寶信嫁甫七日元兵犯

浙寶信從張世傑等奉廣王益王浮海死饒氏守節無

他志

謝枋得妻李氏安仁人元購捕枋得急拘李于獄時總兵欲妻之李解裙帶縊死有一女亦死

臨海民婦王氏美姿容伯顏師至被掠于夫長殺其舅姑與夫而欲私之婦誓死不可令俘婦堅守之因陽曰能裨我葬舅姑與夫乃可事主君千夫長從所請王送葬畢至嶧上清風嶺仰天竊嘆曰吾知所以死矣即嚙指指出血寫口占詩于崖石上曰君王無道妾當災棄女拋男逐馬來夫面不知何日見此身料得幾時回兩行清淚偷頻滴一片愁眉鎖未開回首故山看漸遠存亡

兩字實哀哉寫畢即投崖下以死血滲入石間將陰即墳起如始書時不爲風雨剝蝕丞徐君端樹石刻碑于死所浙東元帥秦野不華守越日爲立廟像鄉之人私表曰貞婦易嶺名曰清風

韓希孟岳州人開慶己未北兵破州爲游卒所掠以獻主將韓知不免乘間赴水死時年十八越三日有得其屍于練裙中題五言長句曰宋未有天下堅正臣禮秉開國百戰功每陣惟雄整及侍周幼主臣心常炯炯帝曰卿北伐山戎今有警死狗莫擊尾此行當繫頸即日辭陛下盡敵心欲逞陳橋忽兵變不得守箕穎禪讓法堯舜民物普安靜有國三十年仁義道馳騁未改祖宗法

天胡肆大青細思天地理中有幸不幸天果喪中原大  
似裂冠衽君誠不獨活臣實無魏丙夫人馬得人垂戒  
當耿耿江南無謝安塞北有王猛所以戎馬來飛渡江  
陵境大江限南北今此一舸艫本期固封疆誰謂如畫  
餅裂火燒岷岡不辨金玉礦妾本良家子性僻守孤梗  
嫁與尚書兒御署紫薇省直以才德合不棄宿瘤瘦初  
結合歡帶誓比日月炳鴛鴦會雙飛比目願常並豈期  
金石堅化作桑榆景旄頭勢正燃岫尤氣未屏不意風  
馬牛復及此燕郢一方遭劫虜六族死俄頃退鷁落迅  
風孤鸞吊空影簪堅折白玉瓶沉斷青綆一死空冥府  
志常炳炳意堅志不移改邑不改井我本瑚璉器安  
肯作溺皿志節匪轉石氣噎如吞鯁不作爝火燃願爲  
死灰冷貪生念麴蛾乞憐羞虎穿借此清江水葬我全  
首領皇天如有知定作血面請願魂化精衛填海使成  
嶺韓名希孟年十有八魏公五世孫襄陽賈尚書子瓊  
之婦

王氏婦梁臨川人歸夫家纔數月元兵至與夫約曰吾遇  
兵必死若後娶當告我頃之夫婦被執有軍千戶強使  
從已婦給曰夫在此不忍乞歸之而後可千戶以所得  
金帛遺其夫而歸之約行十餘里千戶即逼之婦拒且  
罵被殺數年夫以無嗣謀再娶議輒不諧因告其故妻  
夜夢妻曰我死後生某氏家今十歲矣後七年當復爲

君婦明日遣人聘之一言而合詢其生與婦死年月同云

劉全子妻林氏福清人全子以福建招撫使起義兵敗自經死有司執其妻具反狀林大罵曰劉林二族世為宋臣欲以忠義報國何為反乎吾死且求治汝于地下遂遇害

岳州徐君寶妻某氏被虜來杭居韓蘄王府自岳至杭相從數千里主者數欲犯之而終以巧計脫蓋某氏有令姿主者弗忍殺之也一日主者怒甚將即強焉因告曰俟妾祭謝先夫然後乃為君婦不遲也奚用怒哉主者喜諾即焚香再拜默祝南向飲泣題滿庭芳一詞于壁

上巳投大池中其詞曰漢上繁華江南人物尚遺宣政風流綠窓朱戶十里爛銀鈎一旦刀兵齊舉旌旗擁百萬貔貅長驅入歌樓舞榭風捲落花愁清平三百載典章文物掃地都休幸此身未北猶客南州破鑑徐郎何在空惆悵相見無由從今後斷魂千里夜夜岳陽樓王氏龍溪人蘇宋傑妻年二十一而寡方娘夫家貧父母欲奪其志誓不許父母怒絕其往來既生男父母意猶未解不得歸寧者七年及男既長則曰吾今不復強汝嫁矣愛如初

侯氏南豐人謝泌妻家貧事姑孝盜起侍姑不去盜逼之不從刃之不死遂得生仆溝中賊退漸甦見一金珠篋

四百二十一節  
族婦以爲已物稍分之辭曰非我有不願也後夫與姑俱亡子幼父母欲改嫁侯曰寧餓死耳卒終其節李氏歸劉汝霖生子安雅未及百日夫卒誓不負所天一節終身

葉氏慈谿人歸鄞之史簡簡爲縣尉杖死葉氏時年二十五日夜抱幼女悲泣夫死時方娠囑曰若生女當嫁果男也幸謹視之葉氏泣受遺言後果得子於是毅然自隣保咸謂汝家若是祿中兒寧可恃耶葉氏誓死不

聽

張氏名妙靜慈谿人年十九歸本邑李慕甫入門夫已病革一顧而易箆或云伉儷未成盍返而從其父母張氏誓不許曰入李氏之門即李氏之婦義不再適守節終身年八十四卒

張氏婺源人許某妻也年二十餘夫死遺腹生一子明年姑與子俱死夫族盡據其家而有之乃還母家鬻簪珥自營一室奉許氏祀孀居二十三年而歿

吳中孚妻某氏進賢人少寡景定元年兵亂携孤女自沉于縣之染步曰義不負吾夫

楊氏知欽廉州友之女適蔡若訥喜讀書通大義夫卒時

年二十有三守節不二書乞爲寒水玉願作冷秋孤三  
句于壁以自勵

黃氏名桃娘德化士族女美姿色早喪父年十六適同里  
陳德環期年夫以役死于外計至痛哭絕而復蘇亟尋  
夫屍歸葬母憐其少無子每迫之嫁黃知不免一日假  
以澣衣于門前溪側遂投水死

王氏奉化人年十九歸廣平舒立三月而夫亡後媒妁踵  
至王氏答曰雖父母有命我志不可奪也守節終其身  
年八十八卒叅政樓鑰立石于塚上題曰宋節婦王氏  
之墓

胥氏金谿人嫁黃君雋未期而寡父問所志答曰生爲忠  
孝家婦死爲忠孝家鬼蓋以雋爲忠孝黃彥遠之裔也  
朱氏開封民婦夫日與俠少飲博犯法徙武昌父母欲奪  
而嫁之朱曰何迫我如是耶其夫將行一夕朱自經死  
且曰及吾夫未去使知我不爲不義屈也

金氏高淳人少寡居貧甚里有惡少欲污之持刃逼脅余  
曰決無從汝之理可即殺我遂見害有司以事聞表其  
市曰節婦里

鄭臘兒妻康氏曹州人夫早卒康以死從之旌曰貞節  
徐順妻彭氏東平人夫早卒彭尚艾竟以死殉詔旌其閭  
夏氏德興人余應琦妻年十九應琦卒無子立嗣以守後  
旌表其門曰節義

張吉妻李氏河內人吉遊學數年不返家人欲嫁李竟守節而死表其坊曰節婦

程起宗妻吳氏休寧人嫁再期而舅與夫皆歿以夫族子為後強族利其貲欲改立嗣訟之不得乃迫置一室困之使不能存吳不為動未幾所立子亦卒僅一孫相依為命年八十有二而終

王粉兒汝州人許嫁同里張得山未行而得山死粉兒即柩旁慟哭幾絕既葬復至墓所奠哭遂自縊青楊樹下北辰烈婦某氏楚州淮安人有美色夫為小商載之同行隨至北辰夫病死貧無以殮同舟富商假貨為喪費自恃有恩顧其妻以為已物烈婦既葬之三日復奠以歸

見勢且迫遂取其嬰兒縛置胸號哭赴淮而死徐積嘗記其事作詩哀之曰海水猶可泛君身不可犯淮水猶可瀦君身不可污鸞鳳猶可馴君身不可親不是雲間月便是月邊雲

陳節婦臨海人貢士朱伯履妻年少夫亡有欲奪其志者陳氏撫膺慟絕既甦嘆曰吾寧速死忍聞此言引刀欲自剄姑亟奪之乃免事父母舅姑至孝詔封安人旌其

門

遼

耶律奴妻蕭氏小字辛國舅駙馬都尉陶蘇幹之女美姿容年二十始事奴睦族以孝謹聞奴被乙辛誣流烏古部上以辛公主之女欲使絕婚辛辭曰陛下以妾葭葦之親使免流竄實天地之恩然夫婦之義生死以之妾自笄年適奴一旦臨難頓自乖離與禽獸何異幸陛下哀憐與奴俱行妾即死無恨帝感其言從之後舉家召還保大中命諸子避賊辛死之

耶律木者妻蕭氏國舅字謹之女性端慤有容色年十八歸木者謹恪貞婉娣姒推重及居木者喪謂所親曰夫婦之道如陰陽表裏無陽則陰不能立無表則裏無所附木者早歲登朝有才不壽儻死者可見則從不可見則當與俱自刃而卒

耶律中妻蕭氏小字接蘭年二十歸中事夫敬順夫慶中為賊所執置刃於頸以死自誓賊遁而免中拜五院都監金兵逼城中謂妻曰吾當以死報國汝能從我乎接蘭對曰謹奉教後中死接蘭無感容俄躍馬突至中所自殺

金

王氏安陽人進士郭丙妻也海陵王南遷丙避亂居杞及元兵渡河夫婦相失王暨少女俱被掠泣謂女曰今夕不死必被辱矣吾勢不能顧汝守者少緩遂投河死



劉氏蒲城人許古妻貞祐初賊圍蒲急劉恐見驅為所汚與二女相繼自盡貞祐四年五月追封劉氏為郡君諡曰貞潔長女諡曰定姜次日肅姜以其事付史館

相琪妻樂氏貞祐問紅襖賊陷掖樂夫婦及子皆被執殺琪與子而欲妻之樂大罵不從賊怒殺之追封西河縣君諡曰莊潔

烏古論氏臨洮總管陀滿胡土門之妻崔立之變衣冠家婦女多為所汚烏古論氏自縊死

李伯通妻周氏石城人元兵之亂為所獲謂同行者曰人雖愛其生萬一受辱不如死即自投于塹幸不死績緝自給教其子易讀書有成

李英妻張氏英為監察御史元兵破濰欲取為夫人不從遂見殺追封隴西郡夫人諡莊潔雲間王圻纂輯

翟節婦易州人金末年二十餘夫從年死翟出入兵刃往來復數百里晝伏夜行以其尸歸負土而葬之既葬又自

刺以無子遭時亂思以義自完乃自決于墓側鄰里救而復蘇始終一節年八十卒

康氏鄜州人夫早亡服闋父取之歸家許嚴沂為妻康氏誓死弗聽投崖而死事聞命有司祭其墓

史氏白水縣人李文妻夫亡誓不更嫁父強以許邑人姚乙史不聽姚訴之官被逼自縊死詔有司旌其墓

蒲氏行唐人嫁樊氏為妻未幾樊卒誓不再適時有山寇

通求為妻蒲氏跳于崖下水中而死鄉人號曰義妻稱其水為玉女塘

其水為玉女塘

以無子豐叔遺思以美自宗氏自央于墓間啼里泣而

數樓百里書為文以以其只體食土而藥之埋藥又自

賢慎敬是休人金末辛二十餘夫終半來賢出人兵反封

遂具送能捷躡西樞夫人八臨華樓投于地幸不死續編

李英妻張氏英為溫察驛吏示兵如賊將刃為夫人不終

續文獻通考卷之七十五

皇明進士雲間王圻纂輯

節義考 節婦三

元

劉氏伏羌張忠妻年二十夫亡守節終身至元三年旌表

周木忽妻崔氏元初從忽官平陽金將破平陽令官屬妻

子敢匿者死時忽以使事在上黨崔氏即抱幼子禎詭

言于將將信之使軍吏書其臂出之崔氏不使吏執臂

自揎袖吏懸筆而書既而將知其詐追之伏土窖三日

得免與木忽會未幾木忽亡崔年二十九大慟柩前誓

不更嫁有謀娶者乃自爬毀其面四十年不妄言笑人

以此古烈婦云  
薛世榮妻韓氏河內人世榮歿時年二十一孀居守節年

七十八而終至元五年旌表其門  
王傑妻盧氏溫縣人年二十傑亡志行貞潔終始如一至

元五年旌表其閭  
張興祖妻周氏澤州人少年守節其祖母及母並以貞節

著人或勸改適曰不孝不義吾不為也居嫠三十年舅  
姑與父及外祖皆盡奠祭禮詔旌其門

陳氏韓城人適邑人孫謙生子景仁甫一歲而謙卒氏方  
十九誓不易節至元十六年旌表其門

李氏涇陽人符文進妻年二十六文進卒誓不再嫁至元  
中詔旌其門

中詔旌其門

任建妻王氏尉氏人建仰弋林中墜矢中面而死時壬年  
二十三一子尚在襁褓父母憐其早寡欲嫁之王曰任

氏有後豈忍背之誓不他適歷四十餘年而終至元間  
事聞詔旌其門

李氏南豐人曾閨妻夫死守節至元壬午葫蘆峒寇猝至  
甘言誘之大罵賊而死

段氏隆興人霍榮妻榮卒段氏年二十六止有養子而諸  
父貪其產逼段再醮使養子歸宗段引針刺面墨漬之

誓死不二大德初旌其門

吳氏興和人夫死自刺其面誓不改嫁詔旌其門

謝思明妻趙氏成紀人夫死自髡其髮誓不再醮詔旌其門

田濟川妻武氏冀寧人曹子英妻尤氏溧水人夫亡皆嚙指滴血誓不再嫁各旌其門

霍氏二婦俱鄭州人至元間尹氏夫耀卿歿姑命其更嫁尹曰再嫁失節妾不忍爲也姑不能強楊氏夫顯卿繼歿慮姑欲其嫁即先曰婦願與尹共修婦道姑曰汝果

能如是吾何言哉於是同處數十年節孝著聞于世

王氏懷安人歸爲同邑吳氏婦年二十有九而寡守志不

二大德五年旌表門閭  
官用妻王氏遼陽人大德八年哭夫而死

耶律忽魯不花妻移刺氏夫同知湖州路事旣歿割耳自誓廬墓側不食死

謝氏上猶人名十九娘邑徐仁妻年三十夫死夫黨有徐祥者陰許爲富家妾謝聞之悲慟自縊而死大德間廉訪司至縣祭之表其墓曰貞婦

闕文興妻王氏名醜醜建康人至元中文興從軍漳州爲萬戶府知事會陳弔眼作亂文興戰死王氏爲賊所執

逼汚之給曰收葬吾夫然後惟命及得夫亂屍中積薪焚之亦投火死大德中漳州路上其事下詔旌其門仍

封文興英毅侯王氏貞烈夫人立廟祀之賜額雙節溧陽甘士人妻大德丙午士人挈妻館寓句容潘家村值

歲荒績網給食一日夫携網出賣不復還人有利其色為給食因欲私之婦正色曰我非如是人也其人謂我不汝給汝亦餓死矣婦曰我寧餓死誓不苟生閉戶益嚴彌月人開視之則已死矣

丁氏新建人鄭伯文妻大德時伯文病時丁與訣曰君脫有不諱妾當從但君父母已老妾且忍死以奉其餘年必不負君伯文卒丁氏年二十七始終不改節事舅姑盡孝事聞詔旌表其門

郝氏永壽人田大妻胥氏田二妻周氏田三妻兄弟三人俱死于兵郝年二十一周年十八胥年十九俱堅心守節終身不嫁延祐二年旌表時邠州任氏亦一家三婦少寡不他適戮力蚕桑以養舅姑俱被旌

范遇時妻顧氏既嫁而早寡育孤謹節垂四十年延祐間事聞旌表其門

關氏邠州人孫世昌妻年二十三而世昌卒守志不渝六十年延祐中旌表

熊氏南城人喻克成之妻克成早卒熊氏始終不虧婦節至治間旌表其門

宋天民妻陳氏汝州人年二十五而夫亡乏嗣誓不再適守節三十六年始終不渝至治中旌表其門

譚拱辰妻黃氏夫喪年幼子景星甫四歲堅白自持訓其子起家永明教諭以孝行稱延祐泰定中母子俱旌

余氏名正順昌人年十六父從周許妻黃壽明年將樂土  
豪伍馬榮者欲強娶之余氏告其父曰既受黃聘即黃  
婦也吾寧死而不失節父以其辭辭之又明年歸黃黃  
來迎之士豪遣百餘价俟于道殺黃而奪余氏余氏給其  
价還乃扶黃柩歸白于官土豪坐誅遂卜地葬其夫自  
殺以從時致和已巳歲也

趙彬妻朱氏洛陽人名錦哥天曆初為西兵所掠將犯之  
朱度不能脫即給之曰幸釋我舍後井傍瘞金發以遺  
汝西兵信之朱得近井即抱三歲女赴井死

羅五十三妻貴哥蒙古人五十三同知宣政院事天曆初  
以罪竄籍其家以貴哥賜近侍卯罕貴哥自經死

杜友開妻吳氏江陰人友開儒者家貧教授吳辟纒助之  
天曆間歲歉友開竟餓死吳昆弟欲挈吳以歸吳以義  
折之遂相枕籍而卒

馬奔妻胡氏名順奴順德人奔死自縊殉葬至順元年詔  
旌表其門

黃景立妻彭氏永豐人年十八生一子景立亡斷髮誓不  
改適至順間詔表其門

哈刺不花妻脫脫尼雍吉刺氏蒙古人不花死前妻有二  
子欲以本俗收繼脫脫尼恚且罵乃謝罪

李世安妻王氏成都人世安卒弟世顯欲收繼之王氏引  
刀斷髮割耳親戚為醫療百日愈旌其門

臺叔齡妻劉氏順寧人一日地震屋壞壓叔齡不能起家  
復失火叔齡母往救不得欲就焚叔齡望見妻呼曰吾  
已不得出當亟救吾母劉謂夫妹曰汝救汝母汝兄已  
死吾無用生矣即自投火中死火滅家人收二屍爐中  
手猶相握

江文鑄妻范妙元奉化人年二十一歸于江及門未合  
夫忽以癩疾卒范誓曰我既入門即江氏婦也遂居江  
氏家守節撫諸姪如已子

趙美妻王氏內黃人至治初美溺水死王誓守志舅姑念  
年少無子欲使更適人王曰婦義無再醮安可棄而去  
舅姑欲以族人繼婚王不從舅姑逼之王即自經死

趙慶妻高氏新安人年二十一慶亡子幼高躬親耒耜撫  
育其子以成立元統三年旌其門年九十五而卒

唐斗輔妻文氏靜江人大德中斗輔任賓州幕官卒時文  
氏年方二十餘哀慟幾絕執義自誓孝養舅姑舅姑既  
沒葬祭無遺憾其子明蚤世婦蔣氏慕姑之義亦自誓  
靡他至治中旌其門曰貞節

向氏二婦宜都人存仁妻張存禮妻杜各一子二婦年皆  
未及三十堅守節義至元中旌表其門曰節義

花山節婦高淳人失其姓氏至元間爲兵所逼至崇賢鄉  
碑亭橋嚙指濡血題詩亭上有云遙望花山何處是遂  
自縊鄉人哀恤之因名花山節婦

陳端才之妻蔡氏三王龍溪縣澳里人後至元間本處寇起掠其里里媪集里中婦女同舟避難寇追及三王亟以水漬衣冠視王有姿色欲先污之三王緝曰衣濕更求衣冠取衣遂投水死

楊氏鄆縣人閻禎妻禎卒楊甫二十一歲誓志守節約五十年至正元年詔旌表其門

湯氏名潤字妙光處之麗水人適葉河早卒年始二十一守節三十一年卒至正時旌其閭且復其役

蘇守義妻齊氏安平縣新莊人守義病篤謂齊曰我即不諱爾年少可善事後人齊曰烈女不懷二心及死即死以殉有司上聞旌曰死節之門復其徭役時至正六年

郭氏台州千夫長李某部卒妻李見郭氏有令姿心慕焉去縣七八十里有盜出沒李分兵往戍卒遂在行旣而日至卒家調之郭毅然莫犯經半載夫歸具以告一日李過卒門邀入且茗轉身持刃出李幸脫走訴縣捕問傅死罪桎梏囹圄郭氏躬餽食于卒閉戶績紡以資衣食人不敢一至其家久之獄卒葉姓者尤有意于郭氏乃顧視卒日飲食之情若兄弟遂謀之于卒欲以爲妻卒喜諾郭氏曰汝之死以我色我又能二適以求生乎旣歸持二幼痛泣遂携出市召人與之人有憐之者納其子女贈錢三十緡郭以三之一具酒饌携至獄哽咽不能語旣而曰君擾押獄多矣可用此答之又有錢



若干可收自給我徃一富家執作糊口恐旬日不及看君也垂泣而別走至仙人渡溪水中危坐而死見者報縣爲具棺殮葬所死之側山下上司表其墓曰貞烈郭氏之墓至正六年初廷遣使廉得其事原卒初情釋之一說郭貞婦齊義妻也義酗酒刺其千夫長不死事覺當流於廣郭以廣多瘴度義不能生還乃歸其女於董氏送義出郭籲天赴水而死收其屍則端坐水中顏色不變衆因立祠祀之

李青妻張春兒葉縣人年二十而青疾革顧春兒曰吾殆矣汝善事後人春兒斷髮示信誓不再醮尋青卒春兒號慟幾絕囑其梓匠曰造棺宜極大將以盡納亡者衣

服方劍之屬匠如其言既殮乃自經隣里就用此棺同葬之至正八年旌表其墓

毛氏名清娘早適人至正九年寇亂闔門走避毛氏竟不能脫遂大書其壁云寧死義不從賊賊至毛氏以利刃刺賊首遂爲所殺

史五妻徐氏定遠人五爲義兵百夫長至正十年暴兵至五戰死徐氏求夫于積屍中莫能識以口吮血辨驗得載歸治大棺以殮乃沐浴自經死

王相妻潘氏霑化人其舅王伯顏死節于福寧州城陷潘爲賊所執不食而死追封太原郡夫人

程晉妻彭氏偃師人寓居開興壬辰兵變軍士驅迫使隨

彭給之曰我有金若干私瘞于家爾可取之願以從行賊拘少懈至井彭大罵曰吾良家婦肯自愛其生以污身耶遂投井死鄉人號曰烈婦

李氏永新彭九萬妻至正十二年紅巾至李及其子女俱被執脅以白刃欲犯之李罵賊而死

鄧氏崇仁周九成妻至正壬辰盜起被執欲污之罵而死楊用霖妻蕭氏子婦劉氏隣婦陳氏鄧氏壬辰寇起懼爲所污俱投井死

徐氏張孟庸妻德興人壬辰盜欲納徐哭曰芳谷吾祖也夫被爾殺反又事之豈不辱吾祖乎沉水死

王氏德興人壬辰盜起王在室或強娶之赴水死

唐氏龍泉項惠可妻至正壬辰紅巾寇亂惠可具舟遠避甫及新林寇奄至唐見事急與其母俱赴水死

鄺維禎妻曾氏教城人至正壬辰紅巾寇至教城執曾氏欲妻之不從俟間自盡

萬氏樂安人曾希仁妻生三女至正壬辰之亂母子四人恐爲盜所辱俱縊死又聶貴妻劉氏王仁妻劉氏蔣恒妻劉氏俱樂安人守節被旌

董氏譚友妻餘干人紅巾之亂殺其夫與父母兄弟欲污之赴火死

友蘭王妻葉氏閩人至正壬辰王死于戰紅巾萬戶毛壽素慕蘭王德欲庇其母子葉義不受庇携子赴水死

鄭氏建寧路照磨雷景炤之妻紅巾寇亂剽掠其村落景炤及父俱爲賊所害鄭有容色義不受辱遂自殺次日復甦竟全節終

朱至直妻袁氏豐城人壬辰兵變遇寇投水死

劉節婦冀之衡水人通古文孝經小學適同郡曹泰時紅巾陷河朔因避兵聊城村賊掩至大掠見節婦居群人中特妍整持刀驅之行節婦曰吾婦人惟知從夫而已不從賊也賊欲移其心乃盛陳金玉珠璣仍以錦繡衣服被節婦身裂碎之強擁上馬墮地者數四賊怒繩其項就馬上曳之節婦以手爬地以頭觸石流血罵不絕聲遂遇害

以溧陽人元末遭紅巾之亂舉家被害以刀自刎不絕乃抱子入水死

段氏史宛妻餘干人紅巾亂其僮欲犯之殺一女罵不從又殺一男罵不從竟死焉

粉娘南豐人年十八值紅巾掠去不從賊怒殛死之

王弘妻李氏安陽人至正間紅巾賊起弘亡于兵李收尸發喪晝夜哭泣李頗有姿部人爭求爲妻李以死自誓人知其不可干乃白于帥帥許之李度不能支佯曰必待卒虞之後求者諾之迨期遂飯僧大作佛事散家貲翼日清晨引一老婢徑往天寧寺登浮圖絕頂自投而死衆皆駭愕瘞于西門外築土爲臺高數尺以旌節婦

童氏俞士淵妻嚴州人至正十三年賊陷威平剽掠至士淵家童氏以身蔽姑衆欲汚之童氏大罵不屈一卒以刀斷其左臂愈不屈又一卒斷其右臂罵猶不絕乃抉其面而去明日死

黃氏泰寧邑士元實之女至正十三年鄉惡少爲亂元實遇害黃氏被髮跣足奔父死所抱屍哭踊賊憐其色欲汚之黃氏罵不絕口亦遇害

陳氏名道回古田蔣國秀妻至正十三年紅巾賊攻破縣治國秀親族俱被殺道回見太姑蘇妙仁爲賊所擒懇告願代其死賊殺其太姑執道回義不受辱自刎而死邑上其事于朝旌表其門

王氏惠士玄妻大都人至正十四年夫病嘗糞夫死有妾子自守妾子復死曰無復望矣自經于墓樹下

費隱妻王氏良鄉人夫病嘗糞夫死撫其子女已而子又死女稍長以管鑰付之遂相抱慟哭縊死園中

潘氏汪琰妻婺源人琰卒誓不他適以夫仲子元圭爲後元圭孫燕山妻李氏燕山兄子惟德妻俞氏皆早寡矢不他適人稱汪氏三節

蔣氏歙縣吳子恭妻夫亡孀居五十年年七十八卒至正十四年旌

李哥灞州倡女年十二三時母教之歌舞泣不肯學母告以業不可廢哥曰若此聽母母亦當從我好否則有死

已爾母陽許之因是不粉澤不茹葷所歌多仙曲道情有召者先詢主客姓名然後往人亦相戒毋戲狎哥凝立筵前酒行歌闕目不流盼與之酒弗飲州判官嘗忤哥徑還誓不與見孟津縣達魯花赤厚賂哥母夜抵舍哥懷利刃閉卧內罵之曰汝職在牧民而狗彘之不若可急去不污吾刃矣慚怒以回明日知州聞之嘆曰州有貞女而吾不知是一失也吾次子明經舉秀才真若配以禮聘娶之未幾紅巾入寇夫婦被執見哥妍麗將殺其夫哥走前抱夫項大呼曰吾斷不從賊求活寇并殺之

李賢卿妻王氏至正十五年旌表

鄧氏名貞定金谿葛絳妻年二十八居孀至正十五年鄉寇至執欲污之罵而死

樂壽孫妻劉淑靜鄞人歸壽孫三年壽孫溺死同載者多不得屍劉氏生男甫周歲抱之沿流上下仰天哭而求屍屍忽自浮得歛葬焉時年二十九勤苦守志撫孤成業旌其門

張定山妻婁道真范淦妻董守貞謝德政妻仁和陳氏張穀寶妻祝清皆以守節被旌

吳興祖妻呂氏歙人至正丙申夫婦避亂黃山遇賊興祖走賊執呂欲污之不屈遇害

吳克妻戈蘭丹徒人年十八歸克至正十六年賊攻城將

破懼辱投井死時年二十一

劉節婦泰州城隍人至正丙申春隨父渡江居吳門適張士誠部將曹某方數月夫陣亡劉不避凶險躬至死所求得其屍歸葬欲以身殉父不許既而權貴人聞劉美且賢爭欲強委禽馬劉誓死不二遂削髮爲比丘尼黃氏名妙姝松溪人至正丙申青田寇侵縣治黃氏時方盛年與群婦逃山谷間爲盜所執義不受汚哀哭而伏地不行賊怒驅迫以前行數里經高崖數十丈遂投崖下盜意其必死舍而去至暮其夫蹤跡之得于崖下幸不死遂昇而歸鄉黨高之

江必大妻朱氏至正間喪夫無子遭亂至拾草根樹皮爲食竟以節終

丁尚賢妻李氏汴梁人年二十餘有姿容至正中賊至欲虜之李怒曰吾家六世義門安能從賊以辱身乎於是闔門三百餘口皆遇害

高恪妻段氏安陽人奉祀郎恩謙女既歸高氏婦道母儀鄉人範焉至正間寇掠村鎮家人悉奔竄段投井而死年二十有八

張政妻秦氏臨漳人至正間兵至投井而死有司上聞旌表其門閭

張和妻王氏溧水人年未三十而和卒黃截髮誓不改節撫孤子玉成立至正間旌表

王容妻陳氏溧水人與其妾汪氏俱年少容死子幼至正間淮兵陷城邑力脅二氏不從俱餓死後當道嘉之贈貞烈

王氏鄜州人康德明妻年二十而德明卒半月生遺腹子育孤守節至正中旌表

張氏鄜州人賀敏妻敏年二十四疾卒張即自縊同穴而葬至正中旌表

婁氏定遠人于氏婦年二十餘至正中為亂兵所驅義不受辱赴濠水而死

鄭氏呂氏歙人俱為程氏婦至正間兵亂鄭呂匿于里之王鎮橋呂有姿容卒至虜之鄭力救拒卒怒斬之因以

懼呂呂大罵不屈并遇害

羅宣明妻蔣氏歙人至正間斬黃盜起蔣氏往依兄弟于香山寨賊攻寨破蔣氏以二子屬其僕出遇賊力拒罵

曰死狗奴何不殺我賊斫其臂墜崖而死

齊氏太原人適王履謙至正中賊陷太原齊氏與蕭呂二婦及二女避難趙莊賊至度不能免顧謂二女曰汝家

五世同居號曰清白豈可辱身以苟生哉長女曰吾夫已死今得死為幸呂曰吾左丞孫也義不受辱乃與二

婦二女及二孫女俱投巖下死

張氏太倉人年十七始贅周某為夫夫之父為百夫長嘗與同伍謀刺其帥事泄罪連其子及婦斬之帥之子

惜張姿容曰能從我即活張忿罵帥子憤而殺之

范氏名回松溪人葉彥寬妻至正間彥寬得授政和縣簿未任而歿范氏年未三十子一尚幼誓不履二庭有介婦同居新寡將改適范氏力諍不聽乃獨撫其子以居子既長從戍又撫其孫孀居五十年餘終始如一節人無間言壽八十

田氏渾源知州劉仲亨妻生一子彬年七歲至正間仲亨卒田氏年未三旬遂自經喪側事闋旌表其門

趙野妻柳氏薊州人野爲戶部主事未合卺而野卒柳誓不再嫁病不服藥曰我年二十六寡今年逾半百死可矣遂卒

姜善諒妻王氏新泰人至正間夫卒自縊

費氏奉新人余文佐妻至正中渠寇虜掠鄉里縛文佐殺之尋驅費氏欲汙焉投潭水而死

姜本道妻彭氏弟本源妻葉氏至正中道源兄弟爲賊黨余祐二所殺彭與葉訣曰我夫既死賊必見辱俱死之焦士廉妻王氏博興人養姑至孝至正中毛貴作亂爲官軍所虜王氏給取藏金于墓所至則罵曰我欲死墓旁耳與妾杜氏皆遇害

趙氏女平陽人年二十未嫁爲賊所執給賊取藏金自投于廁而死

李宗顏妻夏婉常富州人與女避賊後園中賊至共投井



阿魯溫氏僉事赫赫妻夫亡既葬不食五日而死至正間旌其廬

姜氏開州谷有源之妻夫卒自縊死至正未旌表

毛氏婦胡氏武定州人至正中姑與婦同為賊所執義不受辱罵賊而死旌曰雙節

楚錫妻鄭氏杞縣人夫亡時鄭年二十三哀毀幾絕以禮

營葬遺子咨哲幼弱鄭紡績自給守節四十七年至正

間事聞旌為貞節之門仍命月給衣糧

也先忽都蒙古欽察氏大寧路達魯花赤鐵木兒不花妻

以夫恩封雲中郡君夫免官居大寧至正中

忽都與妾王蓮走尼寺中為賊所得令與眾婦縫衣拒

不肯曰我達魯花赤妻不能為賊作針玉遂與王蓮俱

見殺先是其子完者帖木兒與父出城見執于賊完者

拜哭請代父死賊愛其姿秀遂挈以從後獲脫歸訪母

屍并王蓮葬焉

呂彥能姊及妻女陵州人至正中賊犯陵州彥能姊發居

寓其家先曰我喪夫二十年又無子不死何為赴井死

妻劉氏語彥能曰妾為君家婦二十八年茲逢亂離必

不負若亦入井二女及子婦王氏二孫女皆隨溺一門

死者七人

劉公翼妻蕭氏濟南人至正中毛貴將陷城慮不免謂夫

曰妾詩書家女當作清白鬼于泉下城陷解條自縊死  
趙洙妻許氏湯陰人有壬姪女洙時爲儒學提舉同避賊  
資善寺洙先被殺許氏不知賊甘言誘百方終不從已  
而知夫死慟哭仆地罵不絕口遂遇害寺僧哀其貞烈  
與洙合葬之

張正蒙妻韓氏紹興人正蒙爲湖州稅務提領至正中紹  
興兵變正蒙與韓氏俱縊死女池奴年十七投崖死

余同祖妻曹氏茶陵人至正中城陷自剄死妾抱持不得  
亦自剄死

卓氏尤溪施九泰妻嫁未幾九泰卒卓以死自誓遺腹生  
一子紡織勤劬以供衣食教其子成立至正中有司以

閩詔旌表復其家

杜氏即友直母年十八夫卒誓不改節至正間旌爲母慈  
子孝之門

關惟一妻周氏登封人至正間夫病死周時年二十四囑  
工造棺須大潛自縊而死與夫同棺葬之

蔣義甫妻許氏妻張氏益都人夫卒皆守節至正十七年  
毛貴兵亂俱投井而死

韓軌妻邢氏安陽人至正十七年盜陷河朔時軌知林州  
守黃華砦盜攻之甚急邢語其女曰恐事不濟吾與汝  
必受辱遂俱投崖而死

謝氏諱芾金華人適蘭溪吳履至正十八年師破睦州遊

兵四出虜婦女芾度不能免抱女投崖下死宋濂有傳  
濂女弟藝值是變亦以素節沉淵死

王時妻安氏名正磁州人至正十九年時以叅知政事分  
守太原正從之明年賊兵寇太原城陷衆皆逃正與妾  
李氏同赴井死事聞贈梁國夫人謚莊潔

陳氏名三長樂人嫁同鄉柯宗實至正二十年海賊劫石  
梁宗實適在縣郭陳氏將逃避念其父疾弗能遠致奔  
往省之與賊遇執焉陳氏且行且罵賊怒亂搯之驅至  
舟置之蓬上使其徒守之陳氏乘間赴水死

李弘益妻申氏冀寧人至正二十年賊陷城投井死再娶  
安氏二年而弘益卒安氏膏沐薰香自縊柩側

胡氏岷縣剡溪人諱妙端適同邑祝某至正春爲苗獠虜  
至金華縣將妻之義不受辱乘間嚙指血題詩壁上已  
赴水而死三月二十四日也獠帥服其節爲立廟祀之  
邑人咸曰烈女廟詩曰弱質空懷漆室憂搜山千騎入  
深幽旌旗影亂天同慘金鼓聲滯鬼亦愁父母劬勞何  
日報夫妻恩愛此時休九泉有路還歸去那箇雲邊是

越州

趙宗澤妻衡氏金陵人少有志操時汝穎兵起攻陷建康  
衡與趙棟妻夏氏趙楷妻劉氏俱誓不受辱沉水而死  
時號三烈

余忠宣公夫人蔣氏廬州人公守安慶時城陷夫人率其

女福童赴水死

楊和卿妻尼氏益都人夫早卒守節志貴兵陷益都自縊而死

劉朝綱妻段氏宋氏俱益都人綱爲山東行省理問卒俱縊以殉

管氏政和張子方妻至正末磔寇入邑邑人子女多驅迫以去管氏時年二十餘遂自刎死

陳氏光澤危萱妻至正末寇陷杉關驅掠鄉民男女陳氏與萱俱被執賊索金帛不愜其欲萱被害脅陳氏去陳氏罵不從亦被害

劉氏名愈娘沙縣劉國美妻至正末江西寇鄧克明攻破縣治愈娘失夫所在奔匿草莽間爲賊所掠迫以行至安濟顧謂同行諸婦曰吾寧死不受辱遂抱懷中子投河而死通判劉總以聞詔旌其門

柯節婦陳氏長樂人至正中爲賊所執罵不已忽振厲自投江中屍逆流而上夫驗其背有黑子昇歸殮之

李馬兒妻袁氏瑞州人至正二十二年李病沒袁氏年十九誓不再嫁有王成者挾勢欲強娶之遂縊夫墓

王世明妻李賽兒房山人至正二十五年竹貞軍至縣李氏及其女皆被執李氏謂其女曰與其受辱不若死女曰母先殺我李氏先殺其女而自殺竹貞爲葬祭仍書其門曰王世明妻李氏貞節之門有司上其事爲樹碑

陶宗媛杜思綱妻台州人早寡守節賊至護姑柩不去賊迫脅之曰任汝殺我從先姑地下耳遂遇害妹宗婉姊王淑皆赴水死

高麗氏宣慰副使索羅帖木兒妻至正三十七年夫死于

兵積薪自焚

丑閻妻侯氏閻為賊所殺以布囊囊其屍昇至其家侯氏

出大哭且列酒肉滿前渴者令飲酒饑者令食肉以給

賊之不防已至夜自縊死事聞贈閻河南行省叅將侯

氏寧夏郡夫人表曰雙節

馮三妻閻人不知何氏三不從賊賊副之妻隨三號泣俯

拾剖肉納布裙中伺賊遠收三血骸脫衣裹之大泣投

江而死

三事詳見忠義考

朶里不花妻妾蒙古人不花拜江西行省叅政土寇金榮

作亂不花死其妻卜顏氏妾高麗氏在側不去皆大罵

曰我平章遇爾父子至厚何暴逆至此皆遇害

普顏不花妻阿魯真蒙古人 大明兵至山東不花死阿

魯真歷呼家人告之曰我夫受國恩我亦封夫人今事

至此惟有死耳已而不花二弟之妻各抱幼子及婢妾

溺舍南井死并已填塞阿魯真遂抱子投舍北井女及

妾孫女皆隨溺焉

張思孝妻華氏大同人為貳高兵所執以不受辱見殺其

婦劉氏大罵不已賊并殺之死後姑婦手猶相持

觀音奴妻卜顏的斤蒙古氏宗王黑閭女大都被兵謂夫曰我國族且年少必不容于人自縊死

張棟妻王氏大都人被兵語家人曰吾狀元妻義不可辱赴井死其姑哭之慟亦赴井死

安志道妻劉氏順州人軍欲污之劉氏曰我弟與夫皆進士豈受汝辱軍士以兵摩其體劉氏大罵乃斷其舌而死

宋謙妻趙氏大都人城破趙氏子婦溫氏高氏孫婦高氏徐氏皆美色合謀曰兵且至我等豈可苟全趙即自經死諸婦四人諸孫男女四人衆妾三人皆赴井死

王宗仁妻宋氏永平人進士宋娶女從夫避兵俱爲軍虜行至玉田縣有窺其色美欲害宗仁者宋氏顧謂夫曰必不以身累君携一女投井死時年二十九

徐獠頭妻岳氏大都人城陷夫婦同赴火死其母王氏二女一子皆抱持赴火死

朱氏黃仲起妻杭州人至正中張士誠寇杭州其女臨安奴先別母求死俄賊驅諸婦至其家且令朱氏母子看守朱氏懼受辱與女及妾馮氏俱縊死仲起嫂蔡氏抱幼子玄童與乳母湯氏皆自縊

韋雍妻蕭氏沂州人元末兵亂雍被虜蕭呼雍曰願死君前義不受辱賊俱殺之詔贈蘭陵縣君

李氏光澤人成一元妻至正末江西寇陷光澤邑民依烏

君山之王隆宮以居鄰寇乘機入山剽掠李氏被執驅迫以前行經龍牀石崖深壑處李氏力曳所縛繩與賊俱投崖死

杜原妻蕭氏安陽人元末兵亂原挈家之官真定途遇群盜蕭謂其夫曰汝當避難我自爲計遂投河而死

季銳妻何氏龍泉人至正中避兵于邑之繩門巖賊至被執欲汚之乃與子弟兒女回娘俱投崖而死

韋寅妻王氏名惠高郵人元末城將破里中乘亂恣掠惠匿薪中盜發薪惠恐辱給賊以薪下有金得脫赴井死年二十四姑夏氏俯井悲慟亦自墜有女奴始笄亦赴井死

陳氏福寧州人林克威妻也元季亂兵屠戮克威家陳氏扶姑抱子走匿山谷中後潛歸母家時年方二十有四母憐其少欲使改適令人微諷之陳氏泣曰棄老穉而他適禽獸所不忍爲也毅然勵操終養其姑撫成其子年八十三而終

葉氏大同人張思孝妻元季爲貊高兵所執以不受辱見殺其婦劉氏僵壓姑尸大罵不已兵并殺之後家人驗其尸婦姑之手猶相持不舍

陳九淵妻袁氏分宜人元季兵亂邑萬戶王同者聞袁美姿容殺其夫欲娶之袁曰夫爲我死我當以死報遂自刎

李氏名智貞浦城鄭全妻九歲母卒哀慟欲絕不茹葷三  
 年父以許全後客邵武邵武豪慕其聰慧強納采聘智  
 貞斷髮拒之且數求自死豪不能奪卒歸于全事舅盡  
 婦道泰定間全病歿智貞悲泣不食數日而死元季旌  
 表門閭

蘭氏江西安吉人為鄺家婦陳友諒部屬鄧平章陷其縣  
 帥某聞蘭有殊色將納之蘭曰帥貴人妾事之無恨然  
 吾良人以禮幣聘妾為婦者若干年與生二子妾不忍  
 即背恩軍中禮不備請持一月喪乃為帥婦帥許之服  
 未終移兵別縣帥曰吾如汝約今夕諧吾婚乎蘭曰諾  
 既而帥他之使二卒守蘭曰為取鷄酒具香火今夕

為帥婦敢告先良令一卒俱出乃先殺嬰兒嚙指血書  
 壁曰涇渭難分濁與清此身不幸厄紅巾孤兒未忍更  
 他姓烈婦何曾嫁二人白刃自揮心似鐵黃泉欲到骨  
 如銀荒村日落猿啼處過客聞之亦慘神書罷先刎二  
 子即自刎帥返詢二卒卒指壁間題倩人讀其詩馳白  
 鄧聞之陳陳為立廟旌表

陳道安妻林氏文昌人元末寇亂道安陷于中欲密圖賊  
 謀泄被殺林氏瘞道安泣盡哀自啖土梗而死

閔本妻程氏河內人本為集賢學士有子一女二女大明  
 兵至北本謂程曰吾當死于忠程曰君能死忠妾敢愛  
 其生乎夫婦自縊二女見父母死悲號哭泣亦縊本旁



少男歸河內

李木魯遠妻雷氏順陽人遠為襄陽尹拒賊被害雷為賊所執欲妻之乃詆賊曰我魯叅政家婦縣令嫡妻肯從汝狗彘生乎遂見殺

天台金沙里女王靜安年十七歸同邑楊伯瑞瑞為樞密院斷事官未幾死于兵靜安守節不嫁權貴爭求之至截髮自剄幸不死

陰有光妻張氏句容人年十五歸陰氏六年而有光卒誓不改節父母迎歸許嫁尹氏子氏知乃自刎明日姑至從甦曰不幸至此母以新婦為念言既而絕

王粹甫妻呂氏少寡獨一女織紉鍼縷為食義不易節至正中大饑有欲強聘者乃携其女赴水死

萬性善妻胡氏進賢人夫歿子幼諸舅諷欲嫁之胡不應一日歸集諸姊妹動以利害卒不變言未既而禮幣至門胡乃引刀斫案曰必欲強我命盡今日眾懼而止後卒揭文安題其墓曰貞烈婦

匡才妻高氏邳州人與百家奴守邳時徐守張某攻下邳才擊敗之未幾才計事幕府賊乘虛襲破邳執高氏以去高氏大罵不屈賊怒拔刀斫面仆地賊以為死獲免

百家奴破賊幕府分其產畀之以旌其節名其田曰夫人莊

張氏定遠人樊某妻也有容色夫死于兵子宗吉方十歲

張爲兵所驅溺水渚驅者謂宗吉曰呼汝母來則活汝  
母子張竟不從遂溺死

暗都刺妻張氏華亭人夫爲莒縣監卒于官張自縊死  
李如忠繼妻馮淑安字靜君大名人如忠山東人初娶蒙  
古氏生子任而卒如忠後爲山陰尹病篤謂馮曰柰汝  
何馮斷髮自誓如忠沒兩月生遺腹子名伏李氏及蒙  
古氏族相率來山陰盡取其貲及子任以去惟餘如忠  
及蒙古氏二柩馮朝夕哭臨權厝二柩蔽山下携其子  
廬墓側時年始二十二父母來欲使更適人馮爪面流血  
不從居二十年始護喪歸葬

趙哇兒妻蕭氏大寧人夫死命伍製巨棺自縊同殮

孟志剛妻衣氏汴梁人志剛儒士家貧無子及卒衣給匠  
者曰棺可寬大吾夫有遺衣服欲盡置其中匠者然之  
是夕衣祭其夫自縊死

曹德妻侯氏鈞州人德病死侯曰欲守志而時值亂離如  
此其能免乎遂縊死于墓

奉化陳氏婦以貞節稱者五人初陳元娶竺氏生子侗而  
元卒竺氏年二十二義不再適侗娶璩氏生子瑞泰二  
人侗亦以疾夭璩氏年二十六後五十八年卒瑞娶王  
氏生子通甫而瑞復夭王氏年三十後五十五年卒通  
甫娶樓氏樓氏甫笄歸于陳至二十六而寡父母欲奪  
其志泣不從其姑王氏年老事之尤謹姑卒殮葬悉如

禮子四人長養才娶樓氏生子孟雍孟熙而養才遇疾不愈方卒時樓氏年二十六亦守節不移

李忠妻王氏忠偶溺死王氏求屍得之號痛幾絕既殮又欲赴水死姑救免還家日夜哭絕不飲食數日自縊死劉氏燕山人年二十其婿松江人初不知爲亡卒而自有妻父之贈效貞節昔古歸松當即還後竟不返劉尋至松壻不復認益哀于墓哭剪髮自誦佛經行丐于市宿于嫠姥家人憐之不乏施因構一室製棺夜卧其中殆五十餘年鄰火劉入棺呼曰器物悉取去乞闔棺以畢吾事于是與室俱燬

李氏餘干人歸邑艾子高苗民猝至被執欲污之大罵而

死

張婦鄭氏淄川人寡居以老孫婦李氏亦有節操詔旌曰

雙節

母丘氏四川人適邑人蕭璩年二十三璩死矢志不二詔旌其門復其家

相氏朱原方妻安丘人年二十夫卒自縊同葬旌表

王氏馬英妻夏津人英卒王誓不再醮餓而死旌表

張氏女沂州人適王氏夫卒剪髮歛葬後蒙旌表

孫氏三原張德妻德亡孫年二十四誓死靡他子世享亦

蚤卒妻王氏年二十九亦誓不再嫁世享子忠亦早卒

妻劉氏年二十八亦能守義不渝操履清白先後相望

事聞詔旌表其門

焦氏涇陽人袁天祐妻天祐從征死甘州宗族欲改嫁之焦氏哭曰袁氏不幸三世蚤寡皆守節義豈可至吾遂廢衆不復言事聞旌表

趙十一妻袁氏宣城人年二十生男甫一歲而夫亡袁勵節撫成其子年六十二終詔旌表

李義實妻趙氏南陵人二十四夫亡勵節終身事聞旌表  
甯天驥妻胡氏青陽人胡及筭適甯踰年夫亡守節六十餘年卒事聞旌表

步善慶妻陳氏善慶贅于陳早卒父曰汝年少當爲汝求配陳不答即自經死事聞旌表

李聚妻王氏獲嘉人孝子全之母有淑德生一子二女夫卒時年二十四勵志不貳人莫能奪拾穗紡績撫育孤子總管許公以聞旌表其門

李彬妻張氏新安人年十九夫亡生一子二歲其家憐其少寡欲嫁之張誓不易操有司以狀聞旌其門曰堅節  
劉應麒妻郝氏建康人初應麒卒子方孩時祖姑王氏以夫虎爲統帥死敵不出戶者數十年姑郝氏亦自二十歲守節應麒妻上事二姑惟謹而志操尤勵人謂三世貞節云

隴西李茂德聘同郡張氏女年十七歸李氏生子庸甫六歲而寡舅姑憐其少欲嫁之使左右諷之即引刀截髮

以見志乃止茂德之弟仲德亦早卒其妻張氏年二十有八生子慶方亂亦誓不再適從弟希賢妻陳氏年二十有四希賢卒時其子亦方孕四月守志益堅一門三婦以貞白聞

薛穀妻馬氏名瑞香湯陰人幼讀孝經列女傳通大義父母鍾愛擇壻得穀贅之生一女穀拙于家事婦翁怒責穀遂離去踰三年父母憐其幼諭令再嫁俛首不答乃書女無再醮之義以告父母不從乃投井死留片紙于懷中書謝別父母之辭聞者傷之御史王構作傳

齊關妻劉氏河南人關應募為千夫長戰死劉家貧守節有來強議婚者劉給曰吾三月三日有心愿償畢當從所言至日徑往彰德天寧寺登浮圖絕頂仰天曰妾本河內名家女夫已死不敢失節遂投地而死

燕山項氏其夫江南人行賈燕薊間聘項與居未幾夫死項時年二十奉柩回江南誓以夫餘貲養姑以自終比至姑已改適勵志子居以守夫祀盱江李宗閔列其事而賦之曰少無依倚老何堪白髮婆娑亂不簪憂裏尚思江北好悔將夫骨葬江南

傅氏紹興諸暨人年十八適同里章瑜瑜為苛吏脅軍興期會迫死道上訃至傅氏蒲伏抱屍歸號泣三日夜不忍入襯屍有腐氣猶依屍呵含日冀復甦既入棺至嚙其棺成穴及槨投其身壙中母強挽以出制未百日母

欲奪志語聞遂大慟連日不食母囑侍婢謹視之閱數日給婢吾當浴若輩理沐具俟予既而失所在明日婢汲井見二足倒植井中乃傅氏也

鄭氏四節婦歙人卽千齡妻洪氏年二十六而寡始終貞白子二曰玉曰璿王死節妻程亦死之妾何矢志撫其孤璿早卒妻王亦不二志云

汪氏休寧人夫亡監郡欲取之託媪探其意注罵曰監郡風化之首而爲此何以見吏民乎守節終其身

管玉田妻梅氏兵破城夫婦匿小民家兵入夫逸去梅爲賊所得將活之梅乘間赴水水淺不得溺至以刃臨之不爲動復以鉤力挽不肯升乃以戈戡其腋死

武僉事妻陳氏武卒父母迫之再嫁陳對鏡以墨刺面爲痛念夫情四字矢不更嫁

龔氏三女晉江人長曰益適柯允中允中從戎而歿益年二十五次源能誦說古賢女言行年十八適張仁仁早卒源年二十二欲死相從時其孤尚幼家人苦諭以宗祀無託而止季婉年十七適劉允正允正早世婉年十九携二孤躬負土築墳三女俱早孀而舅姑皆先卒玦

玦無依喪終咸挈孤依父以居甘貧自力誓死不二

楊貞妻趙氏濱州人夫卒旣葬不食死

惠高妻李氏濱州人夫卒自縊

觀音奴妻羅氏濟寧州人夫歿王事投水死

任仲文妻林氏寧海人家貧早寡守節不移年一百三歲而卒

劉應震妻范氏合卺之久應震疾作不能成禮未幾卒服除母欲改嫁不許母曰未配非改節也對曰名在劉氏家廟且有姑在姑歿復有以爲請誓死不易

平章闊闊歹之側室高麗氏有賢行平章死誓弗貳適正室子拜馬朶兒赤悅其色欲妻之而不可得乃以其父所有大答納環子獻于太師伯顏伯顏特爲奏聞奉旨命拜馬朶兒赤收繼小母高麗氏高麗氏夜與親母踰垣而出削髮爲尼

丁氏名月娥西域人軍職馬祿丁之女歸蕪湖葛家已而南北兵起僦居郡中無何汚寇奄至城失守月娥慨然曰吾簪纓家女何忍見犬豕耶即抱所生女赴水死婢媵凡九人皆爭入水無後者

范氏汝陽縣民莊十一妻也夫亡范年二十七舅姑老子幼家貧所親勸其他適截髮自誓縫績以養舅姑恪守婦道年八十事聞詔旌爲貞節

張訥妻劉氏藍田人訥爲監察御史早卒劉守志不二河東受兵其二子衡衍俱以事出外劉度不能自脫遂與二婦孫氏姚氏同縊死

吳中妻劉氏安陽人夫亡劉旦夕號泣人不忍聞未半歲生子一日服練歸寧父母欲更適劉曰夫亡子在焉可

他適况舅姑年老無人奉侍自是不復歸寧比舅姑歿  
吳送終盡禮教子成立年八十四卒有司以聞旌表其門  
何氏衢州龍游縣儒家婦至正間爲亂兵所掠裂帛題詩  
曰失身無補君王事死節難酬夫壻恩題畢投江而死  
劉氏大同人至正戊申秋與姑華氏俱爲河南軍帥所掠  
苦被驅迫華謂劉曰汝芳年奈何劉曰有死耳華曰勿  
無刃縊無索柰何劉曰當激賊怒以就死耳遂相與大  
罵遇害時年二十二嘗賦庭栢以自况有旣保歲寒心  
不在遐年壽之句

孝節婦崑山人水得之妻年二十夫亡誓不嫁或勸之曰  
無子老將何依婦拒曰夫者天也天可二乎夫死無子  
命也欲自經其兄子覺之得不死後同籍繫獄婦當連  
坐任事者脅之曰若適人可全婦曰吾不忍以危難棄  
禮義雖死無悔事聞詔旌之

韓氏保寧人年十七遭明玉珍兵亂慮爲所掠乃服男子  
服混民間旣而被虜居兵五六年人莫知爲女子後從  
玉珍兵掠雲南遇叔父贖歸成都以適尹氏人號貞女  
柳氏女嘉興人父爲縣吏至正末紅巾賊陷嘉興女時年  
十八與其父母同竄匿爲賊所得驅以行至河澣給欲  
結襪賊不知防遂投水而死郡人金網作記表之

羅氏名妙安弋陽人能暗誦烈女傳年二十歸鄭琪以功  
擢鉛山州判羅封宜人至正末信州陷羅取所佩刀淬



礪令銛琪問何爲曰時事如此萬一遇難爲自全計耳  
已而兵至自刎死

尹大中妻黃氏穀城人至正末爲賊所虜欲辱之不從分  
其尸與其父母同穴

黃氏崇明人季富妻至正初海寇入境掠士女登舟者二  
十餘人黃氏義不受辱即投海死時年二十七

王子溫妻華亭人姓諸氏子溫家貧諸以女紅給其服膳  
畧無愠色元丙申兵劫松江子溫欲挈以逃難諸流涕  
曰豈可以我一婦人致累汝耶汝第去我自爲計乃與  
鄰媪避於南城陋室中少頃賊入隣媪皆爲所汙獨諸  
怒罵不從賊掣手刃剖其腹罵不絕口而死

賈元琇上海名家女歸廣陵朱氏元至正間從宦江陰盜  
起因歸寧避亂邑陷苗軍露刃欲私之元琇罵不已苗  
怒剗之妹元徽有女德歸華亭陶氏年三十喪夫誓死  
不嫁時號雙節

沈景新母妻平江人元至正中景新調上海吏江浙苗軍  
大肆殺掠母與婦謀曰吾家素清白義不受辱尋爲苗  
軍所擒曰你能從我不殺汝婦姑大罵苗軍怒刃其姑  
縛婦髮馬尾曳殺之

禹氏崇德石門人吳守正妻名淑靜嘗從容謂守正曰方  
今群盜蜂起萬一不測妾惟有死而已元至正中盜陷  
崇德淑靜倉皇移八歲女登舟以避有盜數輩奔入其

舟乃抱幼子投河死

茅氏崇明人朱虎妻元大德間虎官都水監坐罪籍其家  
吏錄送茅氏及二子赴京太醫提點師甲乞婦家欲妻  
之茅氏誓死不從母子三人以裾連結晝夜號泣形貌  
銷毀師知不可奪釋之虎故人王大卿等贖茅氏爲永  
明寺尼憂憤不食卒後虎兄子謙以聞旌表其墓錄付  
史館

周婦松陽人姓毛氏美姿色至正中隨夫避亂麻鷺山中  
爲賊所得脅之曰從我多與金否則殺汝毛氏曰寧剖  
我心不願汝金賊以刃磨其身毛氏大詈曰賊碎則  
我碎則香賊怒剗其腸而去

金氏鄞縣人程徐妻父端學仕元爲詳定使有女名瓊適  
溲州同知陳介至正中京城破金氏謂女曰汝父出捍  
城我三品命婦汝儒家女又進士妻不可受辱抱二歲  
子及女赴井死

徐氏天台人狄恒妻恒早沒徐年十八守節不再醮至正  
末避亂牛圍山爲賊所執驅迫以前給之曰吾渴甚欲  
求水一杯賊令自汲即投井死

卽氏安吉人宋進士朱甲妻甲仕浙東以卽從至元間朱  
沒卽護喪還至玉山里留居避盜勢家柳氏欲強聘之  
卽不從死拒得免家居事姑甚謹姑嘗病卽禱天割股  
肉進啖而愈後姑喪以哀聞大德中旌

湯輝妻張氏龍泉人滇兵亂先移家財出砦夫與姑守之  
舅以疾未行張歸供藥膳賊至即以輿載舅行已而遇  
賊賊以刃脅之曰從我則生否則死張掠髮整衣請受  
刃賊未忍殺張懼汚即奪其刃自刺死時年二十七

臨淄陶國賓妻許氏 齊東柴文志妻孫氏

長清楊惟儉妻任氏 膠州田婦閻氏

行省都事賈訥母劉氏 沔池李四妻茹氏

大名王德政妻郭氏 益都秦江妻馮氏

諸城崔立妻紀氏 諸城王瑀妻鄭氏

昌邑呂義妻岳氏 莒州鄒惟新母徐氏

高密李章妻王氏 嘉祥黃宅妻武氏

朝邑馬宅妻王氏 濰州王實妻傅氏

臨朐巨林妻王氏 臨朐楊原妻顏氏

蒲城党通妻張氏 南樂趙遜妻庫氏

南樂韓德妻楊氏 利津馮母劉氏

濟寧尹貞妻神氏 章丘盛時中妻劉氏

濟寧李鳳妻劉氏 濟南李名妻劉氏

濟寧王德妻秦氏 章丘游貞妻王氏

章丘劉聚妻王氏 臨清宋居讓妻王氏

中興路伯顏妻阿迭的 章丘馬榮妻晉氏

臨淄牟處士妻耿氏 濰州國忠妻鞠氏

鄒縣房天驥妻祝氏 濰州韓敬妻周氏

南樂睢伯顏妻劉氏

長山尚敬温妻 氏

章丘趙讓妻王氏

樂安聶貴妻劉氏

即墨張約妻宋氏

建昌王時清妻李氏

寧海姜思敬妻閻氏

城武王宅妻苗氏

高州蕭又妻趙氏

衛輝安寅妻陳氏

河間王成妻劉氏

冀寧李孝仁妻寇氏

奉元李郁妻崔氏

濮州王義妻雷氏

南陽郟二妻張氏

懷慶阿魯輝妻翟氏

龍興張仁興妻鄒氏

樂安王仁妻劉氏

樂安蔣恒妻劉氏

茲陽劉洋妻史氏

淄川王德用妻張氏

淄川公孫頤妻蘇氏

淄川王婦胡氏

吳江方伯洋妻江氏

益都張崑妻丁氏

壽光張婦 氏

壽光掌谷稅妻劉氏

壽光朱行義妻赫氏

壽光蔣婦毛氏

高苑楊富妻崔氏

昆明皇甫璇妻楊氏

昆明桑知州妻李氏

昆明景縣尹妻王氏

東平州刺臺妻蒲氏

東平州楊三妻張氏

陽穀劉玉妻王氏

新昌蔡玄通女

高安胡氏

德興葉起巖妻方氏

鍾離程寬妻孫氏

魯山王大妻張氏

漢陽劉通判妻梁氏

古田李仕遠妻余氏

燕人張買妻王氏

續文獻通考

馮翊王義妻盧氏

睢陽劉澤妻解氏

大都潘居敬妻陳氏

大同李文寶妻張氏

河南閻遂妻楊氏

大都王成妻高氏

冀寧梁世明妻程氏

大興郭仲安妻李氏

昌樂尚成妻劉氏

辰州萬戶圖格里不花母石林氏

金州杜祖隆妻張氏

大都劉德仁妻王氏

大都同知忙兀秃魯迷失妻海迷失

山丹州郝榮妻李閏

甘州阿兒思蘭免古妻忽都的斤

濟南馬萬妻晉氏

大都右警巡院胡德妻曹氏

大寧李天麟妻韋氏

沁州劉煒妻張氏

任城王德妻秦氏

金華吳墳妻宋氏

廬州高仁妻張氏

甘州岳忽南妻失林

蓋州完顏帖哥任妻李氏

良鄉韋安妻張氏

永城縣民張氏

奉化舒燕妻徐德柔

奉化朱春妻舒淑初

奉化張紹庭妻汪本奇

慈谿方婉妻翁淑真

慈谿沈景莊妻顧氏

慈谿沈則妻王氏

以上皆守節被旌行實未詳附著于此

雷州朱克彬妻周氏

大都費巖妻王氏

大都買哥妻耶律氏

曹州鄭臘兒妻康氏

陝州陳 妻別娥娥

大同宋堅童妻班氏

大同李安童妻胡氏

晉州劉恕妻趙氏

冀寧王思忠妻張氏

饒州劉楫妻趙氏

東平徐順妻彭氏

大寧趙雁兒妻安氏

大寧陳恭妻張氏

大寧武壽妻劉氏

大寧朱敬先妻謝氏

大寧撒里妻蕭氏

大寧何千妻桓都賽兒

古城魏貴妻周氏

任城郭灰兒妻趙氏

棗陽朱某妻于氏

益都楊和卿妻尼氏

益都劉朝綱妻段氏妾宋氏

安丘朱元方妻相氏

葉縣王保子妻趙氏

興州民妻魏氏

樂州裴 妻董貴哥

真定民妻周氏

冀寧民妻魏益紅

成都張保童妻郝氏

利州高塔必妻白氏

河南張 妻盧氏

蒙古泰木妻阿不察

蒙古相兀孫妻脫脫真

以上並以死殉夫蒙褒表或賜錢贈謚行實未詳附著于此

續文獻通考卷之七十六

皇明進士雲間王圻纂輯

節義考 節婦四

皇明

宗室知志娶賀氏生三女志

病革度不起賀即潛靜室自

縊家人驚救之後吞水銀求死又救之遂閉口不食亦

不言與志同時卒 慶成王以聞 世廟嘉其節 詔

旌之

肅府沿山王繼妃楊氏未配

王薨楊願入府奉姑守節

終身嘉靖二十八年九月禮部覆巡按路楷題貞烈異

常 詔楊氏准封 沿山王繼妃入府守節

北直隸

胡氏南城李華妻華隨父出外其姑易氏與徐璉通因逼  
汚胡氏以滅口胡堅不從易與璉乘夜以土囊掩殺之  
事聞嘉靖二十年 上命立祠曰哀烈 諭祭誅易璉  
孫氏中城時雍坊民趙嘉彥妻嘉彥病亡孫不食而死萬  
曆十九年以御史楊鎬奏旌之

劉氏薊州李彥賓妻年二十四而彥賓卒家貧子幼誓不  
更適子既長娶婦楊氏未幾子亦死婦姑相依以貞節  
自持至老不渝洪武中旌爲雙節之門

梅氏安東人年十八適士人謝黑兒夫疾篤囑曰爾年少  
勿爲我慮梅泣下欲自盡以隨姑覺而止之曰吾夫婦  
無他兄弟備養况汝娘未媿倘得一子以續吾祀豈不  
美乎梅悟後果生一子夙夜紡績奉舅姑課幼子舅姑  
卒脫簪珥以襄事其子俊亦成立孀居四十餘年有司  
以聞宣德間旌表其門

王氏豐潤縣人嫁興州前屯衛千戶胡海海歿王氏年少  
無子誓不再適人母欲奪其志王氏嘆曰若事二姓孰  
與從夫于地下乎遂自縊正統中旌表其門

房氏鉅鹿人爲魏溥妻溥疾革顧房曰死不足惜但母老  
家貧赤子蒙眇房垂泣曰母慮母子在妾一身溥卒房  
操刀自割左耳置棺中曰鬼神有知相期泉壤終身不  
預燕席事姑敬養訓子成立後孫爲濟南太守



陳氏開州張慶妻慶疾革顙天願以身代謂其夫曰汝死  
父母必再嫁我不如從汝庶幾免辱是夕自經明日慶  
亦死郡人莫不哀嘆

崔氏真定深州周傑妻洪武間傑任兵科給事中以疾沒  
崔氏奉骸骨歸祭奠畢告其親戚曰夫婦義當同穴今  
夫死我無生理遂經死合葬

高氏真定深州人適清河李茂茂克吉安衛總旗墮馬病  
臥高奉湯藥不離左右茂亡悲泣甚哀乃盡散家貲爲  
喪具復買一間棺置尸側至夜沐浴更衣自經死與茂  
合葬洪武中旌表其門曰貞烈

岳氏深州岳興女適傅嘉嘉病革呼岳曰爾年少善事後  
夫岳涕泣曰吾豈忍事他人寧俱死及嘉卒岳憑尸號  
哭遂經死合葬之洪武中表其門曰貞烈

李氏安平人郭士文妻年二十五而士文卒李奉舅姑撫  
遺孤孝節兼全洪武中事聞旌其門曰貞烈

范氏棗強人蔡甫原妻年二十四而夫卒父母欲嫁之范  
不從養其姑終身教育諸子咸底成立鄉人嘉其節事  
聞宣德庚戌旌表

孫氏南宮人御史孟著妻年二十夫亡撫子以慈矢靡他  
志始終一節事聞宣德五年旌表

張氏安平人翟得妻年二十一而夫以國子生卒於京張  
聞之遂自縊死事聞旌表其門曰貞烈

施氏定州衛百戶何毅妻年二十一生子甫二齡毅死哀痛漿水不入口欲自殺殉葬姑知有孕勸阻之後果生子舅姑親戚憐其少欲嫁之施曰夫亡子幼况舅姑年老無依可適人乎遂奉舅姑以終撫二子至於成立年六十二歲本衛事聞旌表

徐氏藁城人教諭石麟之繼室隨夫之任廣東正統初麟卒於官時徐年二十四踰三月生子玉前妻子方五歲徐攜二幼扶櫬還鄉禮葬養舅姑甚謹舅姑相繼卒皆以禮葬之徐以紡績爲生終無異志教二子繼承父志勉以修學後登甲申進士任御史成化二年旌表

喬氏臨城王祥妻生一子年方七歲而夫卒家貧守志躬親紡績撫養幼子始終無玷成化四年旌表  
李氏臨城王慶妻生子方五歲而夫卒堅心紡績侍養舅姑恪守婦道始終無玷成化四年旌表

秦氏王璟妻稟性貞恪恪盡婦道璟歿時秦方一十九歲哀痛幾絕生一子名友才守節撫養翁姑欲奪其志秦苦辭誠切翁姑感悟乃止成化中奏聞旌表

劉氏邯鄲民冀相妻夫亡守節終身隆慶五年旌表  
高氏棗強人宋亮妻年二十六亮嬰疾日夜籲天求以身代及亮卒孀居五十餘年始終一志成化中事聞旌表  
王氏齊道妻北直隸昌黎人隆慶三年旌

陳氏牛氏高邑人洪武初監察御史許顥之妾顥病卒二

妾皆自經死事聞旌為雙節

南直隸

尤氏溧水人曹子英妻年少夫死尤氏嚙指滴血誓不更

嫁有司以聞旌表之

吳復妻楊氏金陵民家女復爵安陸侯守黔陽以疾亡楊

氏自縊以殉 太祖親降 手勅封貞烈夫人

石氏句容人朱約妻石歸約甫一歲約病奉侍湯藥三年

不懈約卒守節終身洪武間旌表

孫氏劉彥陽妻高淳人彥陽授平江倉官卒於任值兵亂

李孫氏與一子二女守旅櫬城陷子死於兵孫不從遇害

賊脅二女二女給賊為埋父母至江濱皆赴水死洪武

中旌表

陳忠妻王氏江東人忠為都指揮守交趾王隨之會黎賊

叛忠陣亡王與二女登竹筏出交趾東海城進海門潛

賂賊徒收忠尸殮之扶柩浮海南歸以葬後毀容紡績

度朝夕卒與忠歸土鄉人謂夫妻忠節兩不愧云

倪氏江寧人十六適張豫卒倪年二十六撫二孤益晉

稍長遣就學舅姑壽終力營喪事膏沐不施者五十年

後益舉進士累官學士宣德間旌表

魏氏上元人伊端妻年二十一歲守節大學士劉定之為

作承貞堂記正統中旌表

鄭瑾妻袁氏六合人年十八受鄭聘而瑾得奇疾不能治

袁氏自縊死事聞旌為雙節

哀告於父母歸鄭侍夫疾二年不懈及歿求自盡家人救之得不死曰我一寡婦耳留此何為聞者感泣太宰蕭山魏驥作鄭節婦傳

趙和妻孫氏和為府軍千戶永樂六年征安南卒於軍孫年二十四守節育孤後子輝為駙馬都尉天順間守臣以聞旌表

任忱妻焦氏江陰衛人忱領應天已卯鄉薦病卒焦時年未三十守節終身弘治間旌表

俞氏涇浦人吳達妻年二十二守節有求配者叱罵之輒以刃自盡家人覺而止正德間旌表

江氏六合人馬鑑妻鑑亡躬紡績以事姑教子年八十餘卒嘉靖間旌表

花夫人郤氏懷遠人東丘侯花雲妻陳友諒陷太平雲死郤以其子燁囑侍兒孫氏即以死殉

杜氏鳳陽人夫卒於元末杜年二十三守節育孤洪武十年旌表

周氏臨淮人詹奎妻年十七適奎奎卒無子家特貧周守志不二事夫祖母及姑生養歿葬惟謹永樂中旌表

劉錫妻張氏靈璧人錫卒張年二十有三子幼夫兄逼咬適張剪髮自矢遣子珍就學後舉鄉貢正統中旌表

金源妻盧氏程義妻何氏俱亳州人景泰中同以守節旌表

胡氏五湖人年十九夫亡守節終身天順間旌表

周鑑妻官氏虹縣人成化間以守節旌表

陳氏宿州人方諒妻諒卒陳年十八守節撫遺腹子亦尋

卒陳守益堅弘治中旌表

方淳妻居氏定遠人正德壬申流寇攻陷定遠居死節一

時女婦死節者計五十六人賊平侍郎叢蘭上其事

詔悉旌表

王綬妻徐氏靈璧人正德辛未流賊猖獗徐被虜不從被

三箭七鎗而死時有李希儒妻張氏赴水死董鸞妻茅

氏攜子女赴井死事聞俱旌

李驥妻胡氏太和人正德辛未賊攻太和胡不受辱被殺

一時同節王昭妻陳氏李氏女玉蓮後事聞並旌之

俞氏顧春妻春患病將革與俞訣勉其守節俞號泣不止

因以指抉雙目不得出乃以剪先刺其左目又欲刺其

右姑奪其剪諭曰汝欲養舅姑育二子留一目可也俞

乃止遂守節終焉

彭餘璋妻鄭氏字宜君生儒家歸再暮餘璋卒子方晬抱

持號哭成殮赴水死正統癸亥旌表

徐宣妻卓氏蘇州人宣卒遺孤二逾年二孤歿既而舅姑

皆歿卓操守益堅嘗割股作糜以愈母疾後母亡執喪

盡禮人稱節孝

葉氏崑山人葉文莊公盛之女字夏景澄合卺四月而夫

歿卽誓死以守先依於母母歿復歸于夏夏之舅歿爲  
喪如禮比卒謂家曰只爲名節二字一生如執玉如捧  
盈虞元凱銘其墓

鄒氏適葉芸成婚僅兩月芸卒鄒毀容誓死不出房限不  
見男子姑曰如火盜疾病何鄒曰火至委軀灰燼盜至  
先自刎疾聽其死不得令醫診察年六十而卒

王彥章妻楊氏華亭人楊年二十四夫亡撫孤端長娶婦  
倪氏端亦蚤死姑婦並以節著正統初事聞並旌表

李從吉妻劉氏及二貞女從吉任上海主簿歿於官劉氏  
命訓二女以女道長貞贅壻唐文祥次堅贅壻沈源仲皆  
蚤世母子三人撫三姓之孤各有成壽皆八十餘人爲

作三節婦傳

錢岐妻宋氏華亭人夫卒棄其二女自縊衆媼救之復甦  
誓不復生遂屏食卒年二十五有司以聞 詔旌其門

曰貞烈

張氏三節婦華亭人璿妻胡氏璿妻瞿氏珩妻楊氏俱夫  
亡守節成化中旌表三節之門胡氏又以子貴受封

趙氏女北京人幼有令質刑部尚書張瑩爲次子昱聘之  
未婚而昱卒父母將嫁之女曰我聘於張又誰適乎姑  
衛夫人迎歸華亭守制終身弘治壬戌旌表

何氏女華亭人楊允修妻未婚而夫卒父母強令再適不  
從何自往夫家守制終身以盤車傳餐家人亦莫覩其

百萬曆二年旌表壽七十

袁氏華亭人孝子楊應旂妻夫故守節不渝教子忠裕成  
立頒鄉薦萬曆二十三年以忠裕奏旌表

桂氏華亭人郡庠生唐鏊妻年二十六鏊亡矢志不二子

堯賓甫三歲苦訓成名卒為良吏壽六十七隆慶中巡

按吳從憲類奏請旌

任仕半婦上海人姓俞氏二十一寡居有女始二歲男始

五月誓不二天撫教男女女既笄適俞邦用邦用亦早

喪親戚勸再適女曰再嫁則俞氏祭祀誰奉且辱吾母

乃歸與母同居守志洪武中旌為雙節

張文通婦俞氏上海人永樂初文通嬰瘵疾藥不能瘥孺

俞氏曰吾將死汝年少無子宜善事後人俞泣曰父命

以妾事夫夫今死矣又無子女將何從願從夫于地下

文通歿是夕俞亦自經正統年旌表

蔡倫婦唐氏上海人夫亡守志育二子式堅皆已成立式

娶侯氏亦早卒姑婦並以節著成化中旌表

金氏上海縣庠生金應登女美姿容隆慶中嫁富人徐茅

為妻茅性好賭宦家悍奴因誘之家遂傾復誘其鬻妻

因獻于主主遣數十人要迫之金氏義不受辱自縊死

任氏華亭民張景妻年十九夫亡屏食數日幾絕復甦躬

紡織養舅姑鄉黨稱任孝婦嘉靖癸卯旌表

姚氏華亭庠生馮衍可妻年少夫亡泣哀目昏貞操白首

不渝姊嫁張德瑜亦節孝俱鄉科姚臣女人稱雙節云  
程氏丹陽人千戶陳存信妻初王師攻常州存信死之  
程氏年二十七聞之號慟幾絕兵退行求其尸歸葬之  
子壽嗣爲江陰衛百戶征閩爲盜所殺存信遂無嗣程  
氏守節不渝被旌

臧氏武進人陳旭妻旭疾革語臧曰吾殆不起汝宜善事  
後人臧泣不能答翌日旭亡臧給家人入室取衣衾爲  
殮具卽自經表曰貞烈

巢氏武進人許聘暉氏子暉父卒女言於親爲制服未幾  
子亦卒父母將擇對女曰恐以一女擇二姓遂自經死  
臧氏武進人故民賈熊妻守節六十七年萬曆二十二年

御史饒位奏聞旌表

蕭氏高淳縣故民陳時美妻二十二歲喪夫守節四十三  
年萬曆二十二年御史饒位奏旌

吳氏三節江陰人吳宗傑妻周氏宗道妻木氏宗善妻花  
氏吳兄弟俱以行役死殊方三婦相與謀歸夫骨柩葬  
先塋誓不適他姓 詔表曰三節

楊氏無錫人俞彥昭妻彥昭戍滇南卒楊年二十一子甫  
期家貧誓不他適養姑強以天年終旣而子婦俱蚤世  
楊又撫其孤志愈厲 詔旌之

吳氏江陰人華緯妻正德壬申避賊賊追及吳詐仆負塗  
賊繫之問曰洗塗曰不洗更衣曰不更且詈曰汝當速



殺我我江國公勲臣家女奈何污耶明日又問答如之  
賊怒爭刃之沈于江

袁範妻陳氏武進人夫亡守節受旌

吳谷祥妻無錫人姓劉氏夫亡守節受旌

趙氏江陰人適夏師顏顏早卒趙誓不他適矢志自守終  
其身惟謹受旌

謝氏宜興人宋仲庸妻夫亡守志終其身受旌

萬敬妻史氏金壇人適敬未閱歲敬得惡疾終家人依俗  
火葬史躍入火衆救獲免瘞畢自經 詔旌表復其家

吳氏丹徒人葛彥祥妻夫亡守節受旌

諸氏丹陽人趙德華妻夫死矢志自守受旌

朱氏金壇人莊秀五妻夫卒守志始終一節受旌

高氏婦高郵人攜其女從夫避亂見道旁空舍入其中賊  
將迫脫金纏臂與女且語夫令疾行夫挈女稍遠乃解  
足纏自經賊至焚其舍夫抵儀真夜夢婦告曰我已縊  
死彼舍其精靈如此

管氏二婦揚州人管賢妻闕氏管哲妻馬氏洪武中賢卒

闕氏年二十六一子在襁褓且瞽誓死不嫁後哲繼卒  
馬氏年二十一姑以其無嗣諷之他適馬氏曰伯氏能  
守節我獨不能乎俱力事紡績以養姑瞽子稍長教之  
學星卜以資日給姑以天年終併力葬之後二婦俱年  
七十餘郡上其事旌爲雙節

李氏興化縣監生王之麟妻夫亡以死殉隆慶四年旌為烈婦

高氏江都人儒學生戴和妻永樂中和鄉試不利抱愧投水死高氏每哭踊隕絕誓不獨生一日盛飾白姑歸寧父母乃詣夫沈處號數聲投水死事聞旌為貞烈

方氏合肥人陳順妻夫蚤卒方抱節自守終其身受旌周氏無為人倪景四妻景四早喪周矢志自守事聞旌表盧聰妻朱氏霍山人夫死妯娌多誘之嫁朱誓死不二事

聞旌表

趙氏巢縣葉榮妻夫亡守節有司上其事旌表

周氏六安州人趙軌妻正德壬申為賊所掠給還至家携

子女赴水死

王氏合肥人正德辛未賊眾至王懼辱抱子女赴塘水死御史聞人詮書王烈婦家以旌之

尹氏華亭陳鳴韶妻韶早卒尹矢志不渝茹苦萬狀以養舅姑課子善道成立領鄉薦萬曆壬寅何按院題旌

孫氏桐城人刑部主事錢時妻時當刑孫拔髮為縷繫臂自矢哀請歸養寡姑既生遺腹子惠守節不渝被旌

張氏懷寧人嚴文昌妻文昌早卒張為守節旌表

陳氏宿松人年二十夫卒陳日夕奠哭守節終身旌表

王寬妻張氏太湖人寬望江人寬早卒張年少家貧紡績以養其姑姑憐其苦欲嫁之張嚙指剪髮以誓姑乃止

守節二十六年旌表

陶氏四節婦桐城人陶鏞妻鍾氏鏞子繼娶方氏繼子亮  
領景泰癸酉鄉薦妻王氏妾吳氏鏞繼俱早喪鍾方各  
守節亮亦早卒妻妾共守一室抗節終身 詔表門曰  
陶氏三世四節

汪世衡妻戴氏桐城人正德間遇流賊欲驅掠之戴抱柳  
樹不動賊以刀厲其頸戴厲聲曰何不速殺我賊怒遂  
殺之

周氏繁昌縣丞之女為徐俊妻俊卒無子周為守節成化  
初旌表

胡氏寧國縣人葛之孚妻年二十二而寡生孤觀稍長亦  
死胡與婦施氏相勵以節洪武間上其事旌表

金氏寧國縣人年十六歸胡選孫孫有痼疾臥牀安吉叛  
軍突至家人出走金獨持夫不去後夫歿年甫十八無  
子持志甚堅洪武末旌表

蕭氏涇縣人趙敬忠妻早寡守節天順間旌表

陳氏宣城人郭祥妻早寡守節正德間旌表

張氏旌德人劉旭妻旭死張少且無子倚妾胡氏遺腹子

二婦相吊卒成其志嘉靖間旌表

張氏南陵人劉定妻夫亡守節嘉靖初旌表

阮氏趙仲成妻潘氏姚添麟妻俱銅陵人二婦守節不渝

洪武中旌表

黃夫人雍氏貴池人侍中觀之妻與二女同死於節

何氏青陽人年十八適陳景景登永樂中進士差湖廣公務卒于道何守節終身旌表

李氏石埭人桂智妻夫亡子幼舅姑欲嫁之乃斷髮截耳守節不渝成化九年旌表

黃氏建德人相延薌妻年二十二夫亡無子守節終身弘治初旌表

吳氏青陽人陳逕妻夫亡守節終身正德中旌表

何文字妻江氏青陽人年二十七無子夫病革謂江曰願適人乎願事吾父母乎江涕泣不已夫絕遂自縊

俞氏績溪人許德仁妻夫亡撫孤里人高姓者求婚不聽

而怒中以他事俞訴不得免乃詣 闕陳情事下法司

抵高罪時稱其賢

胡氏績溪章德俊妻夫亡守節旌表

俞氏婺源人鮑叔用妻夫亡守節旌表

孫希賢妻程氏休寧人年二十一寡矢志撫孤卒年六十

二希賢姪英德亦早卒妻汪氏年二十八無子誓死不

二時號雙節

程氏休寧人汪道夫妻生二子夫卒未幾而二子繼卒獨

奉舅姑其父與弟逼使再醮遂自經

汪氏休寧人金希佑妻夫亡守節受旌

陳氏程克良妻祁門人夫亡守節受旌

張氏婺源人胡某妻少貞潔知書年十六而嫁未幾夫亡或欲娶之乃嚙指書衣自刎而死

汪氏黟縣人韓文炳妻夫亡守節旌表

張友妻洪氏歙人友死預治塋誓必同穴姑憐其早寡無子欲嫁之不聽乃陰納富人聘至期逼之洪曰嫁不辭當與夫別乃造夫墓慟哭而歸拜姑告別入室閉門自縊

洪氏歙人劉昌妻年二十而寡絕穀十日死

許氏歙縣江務本妻夫亡守節旌表

陳氏六安衛舍餘趙鑑妻夫亡守節終身隆慶四年旌

蔡氏廣德人陳善慶妻年二十一夫亡守節事姑終身不

改洪武初旌表

屈氏大河衛義官張蓋妻蓋死誓不再適隆慶四年旌

呂氏廣德人曹丑兒妻年二十一夫亡姑憐其少欲嫁之

以死自誓至老不易永樂二十一年旌表

田氏廣德人俞國良妻年二十四夫亡終身守節旌表

張氏和州人周德新妻夫亡守節終身旌表

尹氏含山人張子文妻夫亡有遺腹子可成尹守節訓育

後爲千戶洪武間旌表

包氏高化寶妻和州人夫亡守節終身宣德間旌表

丁氏全椒人袁蘭妻蘭卒丁氏誓不再生竟自縊死旌表

謝氏徐州人段二妻元末兵亂舅姑與夫俱亡乃依父家

守志年八十卒洪武二十五年旌

姜氏沛縣陳恕妻夫亡以死殉隆慶三年旌

白氏沛人李伯奴妻夫亡於邊白年二十簷衣糲食寡居

四十餘年宣德間旌

汪氏潁上縣民王敷紀妻夫亡死節隆慶三年旌

薛氏徐州王五妻年十八夫亡子甫週誓不再適正統十

年旌表

邵氏徐州民李璽妻夫亡守節不改隆慶四年旌

孟氏徐州人居瀚妻年二十餘夫臥病久孟許與同死夫

果弗起孟視殮畢從容自縊

胡氏沛縣民張化龍妻夫亡以死殉隆慶四年旌為烈婦

浙江

平氏仁和人年十九歸同里何富五年而富沒越五月生

男誓不再適事舅姑惟謹撫孤至成人四十年如一日

洪武間旌表

郎氏錢塘高瑞妻未婚而瑞卒矢志守節隆慶四年旌

彭氏嘉興人父公衍鍾愛特甚館張昱為甥未幾昱病卒

兒尚在抱既殯彭求自盡姑泣戒曰吾年老兒年幼且

病忍棄捐耶乃奉姑命調護其兒兒愈遂絕飲食號泣

五日而死

李氏桐鄉人年十八適高逾生子熊方暮而逾亡家貧舅

姑相繼亡往依母居母諭之改適輒慟絕母止不復強

熊旣長娶曹無子爲置妾陸氏甫得子熊又亡曹與陸皆勵操事姑以撫刃兩世三節

沈氏海鹽人年十九適崇德方瑄甫十八日瑄死沈悲摧屢絕而蘇服訖舅姑貧乏令婦依其母母謂年少無子勸改適不從母潛以許人沈覺之緝其母往告外氏母行遂沐浴更衣自縊

沈氏嘉興人太守馬輿之繼室輿以壽終沈年尚少無子悲啼不絕聲者八日遂自經死

梅氏嘉興人父諱江官僉憲擇壻得顧燁妻之燁第進士爲給事中早卒梅卽不食以死

沙氏主事郎理妻安吉人洪武初從夫官京師理死沙哭

曰夫爲忠臣妾獨不得爲烈婦乎遂自經 賜祭馳驛

歸葬

徐氏烏程人年十六嫁未暮而夫病篤顧徐曰我母老爾年少柰何徐泣下引刀斷左小指以死誓夫死遂布衣長齋卒年七十六

石門烈婦湖州人莫詳姓氏正德初湖饑婦與其夫及姑走崇德石門市乞食婦有殊色市人欲挑之與之食不顧與之財亦不顧寓東高橋上伺夫與姑不至及三日聚觀者益衆乃從橋躍入水中以死

王氏吳忠妻安吉人家甚貧正德初疫死婦無依有欲收之者婦不應乃爲麥飯瘞夫塚前痛哭良久以草簣裹

身自沈溪而死

黃紳妻洪氏淳安人年十七歸紳甫一年而紳死生一女  
一日歸寧父母逼奪其志遂抱女觸寒水濟河以歸終  
其身年九十孀胡氏姪婦吳氏皆幼年孀居守節不變  
人以三貞稱之

何道妻鄭氏淳安人年十六歸道越二歲而寡家貧無子  
舅姑欲奪其志度不能免遂自經死

童敦妻李氏名榮壽昌人年二十四而敦卒營敦墓所結  
墳于旁喪終父欲奪志李知勢不可遏又慮自死遺禍  
舅姑家乃屬舅姑家以後事泣拜而歸自經死舅姑爲  
之衣衾及棺至遂昇墓于敦之旁

石氏金華人諱勝浦江義門鄭洪妻洪爲內藏庫提點以  
他累死獄石乃絕粒不食者八日求其死而不可得遂  
引繩自絕 皇祖聞而嘆曰此真義門婦也

陳氏永康人王和欽妻年二十九夫亡遺孤歲餘苦志守  
節勤以自給孤名德中性至孝一日東門失火德中向  
火稽首火遂西轉人謂節孝所感洪武中旌其門

徐榮妻吳氏武義人年十九歲適榮生子甫三歲而榮死  
未幾榮弟廣繼卒其妻顏氏年二十七撫二孤妯娌一  
志奉姑育子恪守婦節年踰六十洪武中表門貞節

李軻妻俞氏永康人年二十五居孀守節子祿婦吳氏年  
二十九夫亡無子誓繼姑志孫齊娶陳氏年十九亦寡



因自誓曰守節婦女常事况李氏世德有自乎台州王  
一寧題其堂曰一門三節婦四世九賢孫

徐氏名瑩東陽趙爲潛妻年二十七爲潛歿撫遺孤晝夜  
哭者累年有爲言禮婦人不夜哭自是夜惟飲泣間誦  
孝經論語小學以節哀痛氣且絕猶誦割不正不食席  
不正不坐目不視邪色耳不聽邪聲諸語緝緝不絕口  
婦郭氏亦以孝聞有司兩上其事 詔皆旌之

夏氏三節衢州夏應保妻王氏文達妻袁氏文質妻邵氏  
俱龍游人青年喪夫相繼守節歷元末亂離中無少玷  
缺洪武初旌其門爲夏氏三節婦

蔣全娘西安人夏顯七妻夫亡時年二十二子在襁褓值  
元末兵亂備嘗艱險誓不改節洪武中旌其門

魏氏衢州人時文璧妻年二十二而夫亡子嵩尚在襁褓  
魏育幼養姑誓不再適年七十餘志節如一吳紳陳敬  
宗皆以詩哀之

程氏衢州潘仲岳妻永樂間仲岳戍遼東解戍者見程色  
戲之程怒解戍者遂以軍政挾與偕行法不能阻程恐  
在途遭辱卽入室自經死

何與適妻范氏衢州人年二十夫亡撫孤兒奉舅姑雖極  
貧窘終無二志正統間旌

董貴珍衢州人董士疇女年二十適勞載是未三月而載  
是卒服闋姑憐其少無子勸改適貴珍剪髮自誓姑不

復強孀居三十七年 詔旌之

吳質妻潘氏松陽人正統間宣平寇起避難橫山賊攻寨兵潰賊至欲脅以行潘不從抱子投崖而死

蔡儼妻包氏宣平人正統中鄉寇作亂包從舅姑避難東巖被執給賊曰我有金銀藏巖穴中當往取之賊以爲然同至其所遂自投崖以死成化二年旌表

谷得與妻陳氏麗水人年二十景泰初鄉賊標掠陳與隣婦同避巖穴被執欲犯之陳憤罵不從賊脅以白刃罵愈厲遂遇害賊去鄉人殮其體葬于小嶺

葉孔賓妻鄭氏青田人孔賓以父卒于官迎喪覆舟死鄭年二十三遺子十月矢心自守妾何氏年猶少鄭謂之

曰我守夫家汝無子宜自擇也妾曰主母旣以節守妾當奉承以全其節何以出爲相與同處年各八十餘時人謂之雙節

蔡氏諸暨人王其妻元至正中張士誠陷諸暨蔡氏避之長寧鄉山中兵猝至有造紙鑊方沸遂投其中而死

潘氏妙圓山陰人徐允讓妻元末兵變允讓與潘氏奉其父安避山谷間遇寇斫安傷頸允讓大呼曰汝寧殺我勿殺吾父寇捨安殺讓將辱潘氏潘給曰吾從必矣若能焚吾夫則吾無憾焉寇爲聚薪焚其夫火方烈潘赴火死安始獲免洪武中旌爲孝節之門

孟貞女名蘊諸暨人許嫁縣學生員蔣文勗未婚文勗克

貢入監爲御史病卒蘊年纔二十聞喪號慟歸蔣執喪  
三年養舅姑盡孝宣德中旌表

舒貞紹興諸仕俊妻年十八歸仕俊數月俊死于商其姑  
念貞年幼謀嫁貞以死自誓慕貞者乃重賂其父母私  
盟之貞知不免給父母治齋荐夫齋畢沐浴衣麻自經  
死

竇烈婦餘姚姜榮妾京師人榮判瑞縣護郡符時華林賊  
攻陷其城突入郡堂竇匿其符而榮未之知也賊竟虜  
竇以行去數里賊中有一郡民求歸賊許焉竇乃密語  
以符之所在俾歸以告榮再行見道傍有井給賊求飲  
遂投井以死

潘氏餘姚縣民任正妻夫死守節終身隆慶四年旌

張氏蕭山陳曙妻聘後陳貧不能娶父謀改嫁之張引刀  
自刎母力奪得不死後歸陳未幾而夫亡張哭之哀未  
三月卽自縊于寢所

孫氏蕭山人許聘葉氏未幾葉氏子病篤將不起孫卽潛  
製歛具囑父母令納葉棺尋忽自盡時守浮梁戴珊躬  
禮其家以旌異之

吳江妻李氏餘姚人舅與夫俱瘦死姑幸存有澄水黃姓  
者謀娶之李誓死不從黃乃通其父詐稱母暴病迎李  
歸省陰令肩輿者輿至黃氏及出輿則非母家姑亦徐  
至李度不可脫乃從容請湯沐湯具求如廁久之不出

闢厠戶視之則已經矣

徐氏山陰包慎妻徐歸慎七年而慎死無子同邑右族欲強娶之徐髡髮毀形以相拒既知不免竟自縊死時余享妻朱氏享死朱年二十三無子享既葬辭墓慟絕亦投河死

馬德真山陰朱偉妻家病疫舅與夫偕亡姑張氏亦病篤德真艱難萬狀待姑疾少愈而母家欲奪其志德真斷指爲誓屹不肯從及姑歿德真撫膺大慟明日死之

李氏蕭山徐黼繼室黼任晉江學訓導妻亡就彼娶李指揮女未幾黼卒于官李年十九父憐其少成勿隨行不從百計懇留之乃求自盡父母縱之扶櫬歸葬毀容荆布訓子成立苦節至老事聞旌表

孫妙吉山陰農家女適同里吳善慶慶死尚艾無子邑人有謀爲婚者乃厚賄其尊長令奪嫁之孫知有盟給以供佛飯僧爲亡夫福始行既具齋乃沐浴更衣禮佛甚恭頃之竟走夫墓縊死

徐氏鄭翰卿妻山陰儒家女嫁未逾月而翰卿遊山右十年不返徐奉舅姑極敬順姑疾劇顛天自代疾果愈後翰卿歸甫旬日病卒徐營葬畢遂絕粒七日死

季氏名添寧波人歸同邑許瑜瑜爲盜所害季抱幼兒從舅氏董仲載走慈谿仲載欲再嫁之季泣訴欲歸自盡仲載不敢復言後盜敗季歸治田廬資其孤從學爲名

續文獻通考 卷之七十一  
三十一  
士年七十卒

陳氏名真黃巖程有德妻洪武間以軍生至京鎮撫陸林見陳美欲污之不從百方脅之陳愈巖厲遂被毆而死夫訴于朝林以罪誅

盧津奴黃巖趙叔民妻洪武中叔民被誣以黨卒于京明年籍其家盧聞官軍至邑遂題詩壁上飲藥而絕

張瓊奴黃巖人適徐宗谷宗谷爲仇人所害張負姑匿巖穴中間道達姻家旣而遺娘生女幸妾生男張撫之若已出明年仇以姑訴受顯戮張始還家招夫魂而葬之誓死不二年五十四卒

林汝殷妻王氏黃巖人生二十歸林未幾汝殷卒里人欲娶之王斷髮以死自誓其父母防之且勸之力王佯許旣而防者少懈乃陰囑侍婢分其嫁時服一歸其母一予其妹一以爲殯殮之具遂自經死

陳氏名小奴臨海人適王三狗一日其夫爲虎所攫卽攘奮悲號而往虎驚駭舍之去負夫以還夫死未幾有欲納爲妾者陳不從乃強致聘物促迫以歸陳度不免亟走姜巖自投而死

劉文淑温州人滎陽教諭黃應發妻應發死無子鞠其婢之子通誓不再適舅垂老孝事甚謹舅卒撫通令就學得狂疾文淑慮黃氏絕祀急與婚配生子性通卒乃抱性育之就學成名後文淑臨終謂性曰我爲汝家婦不

幸三世短命今保汝成立吾可以下見汝祖矣

